

DUK MAN'GIPA KALENG  
A R O  
GIPIN GOLPORANG



*Published by :*  
**K. M. MOMIN**



*Printed at :*  
**Pioneer Press**  
G.T.B. Road,  
DHUBRI. ( Assam ).

Acc. No. 14707

Class No. --- Book No.

Author Momin K M.

Title Duke Mangipa Kalong  
and Gilpin Mangipalang

**DISTRICT LIBRARY**  
**EAST GARO HILLS DISTRICT**  
**WILLIAM NAGAR**

---

*Accession No.*

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

**Help to keep the book fresh and clean**

---

# DUK MAN·GIPA KALENG ARO GIPIN GOLPORANG

*Printed at :*  
**Pioneer Press,**  
G. T. B. Road,  
Dhubri, Assam.

*Published by :*  
**K. M. Momin**  
Tura.



## **Ja'pang Kattarang**

**Jak**

- 1. Duk Man'gipa Kaleng : K. M. Momin ... 1**
- 2. Tengre Me'chik : K. M. Momin ... 28**
- 3. Kaljan-na Donsogimin**  
**Kopal : K. M. Momin 42**
- 4. Noksan : Ma. G. K. Marak 62**
- 5. Dukni Krong : Resh, Krong Pante**  
**Ambeng .. 82**

## Janapsoani Katta

A'chik Ku'rang-ko angni nakatatmiting bilsirango, jean 1965-oni 1969 bilsirangona ong'aha, anga on'tisa sea-jotani gimin gisik nanga gnang kam ka'aha. Ua somoirango ripengrangni seatgiminrangko nisoe, uarangko chapa ka'atna gita taridape aro an'tangba gisep gipuo seatangko on'gilpae kam ka'on A'chikrangni sea-jotani bidingo baditana kingking gisik nanga ba nangja aro maidagipa seanirango dakna namnikbata uarangni gimin u'ie ra'na chol ong'aha.

A'chikrang ramram golporangko seani-rangko poraina namnikbea aro ning'tue chanchibewale segiminrangna bate indakgiparangko bang'bate poraia. Indiba golporangko senaba altuaade ong'taija. Poraigipasa altualtu poraina aro ka'dingna ba duk ong'na ba chanchiskae nina chol ong'a; indiba uko segipade, ramram golpo ong'omangba neng'nade nangtela. 1967 bilsijolo angaba golpo see nina sikpaani gimin an'tangni gisiko nabagipa janggini ong'a obos-tarangko, talate see donaha. Indiba uarangko

anga bilsil kolatchimangna donsretman'e chapa ka'atna chol ong'jaha. Indake 1997 bilsini May jaosa angni A'chik Ku'rang-ni gitcam lekka-rangko bilrurue nipiltaiosa angni segimin aro type ka'e dongimin golpo minggittamko nikpilaha. Uaranga 'Duk Man'gipa Kaleng', 'Tengre Me'chik', aro 'Kaljan-na Donsogimin Kopal' ong'a. Unbaksa Ma. Graciefields Marak-ni segipa golpo 'Noksan', jekon A'chik Ku'rango ( 1966-Nov / Dec Jan / 67 gatataha aro Resh, Krong Pante Ambengni segipa, 'Dukni Krong' jekon A'chik Ku'rango ( May / June-July/ Dec. 1969 ) gatataha, uarangko on'dape ki'tap kingsa dake chapa ka'e nakatatenga. Ia golporang gimikan duknirarasa aro dal'gimin ong'chong chonmiting ong'chong, gisik dongpagipade, an'tangtangnade ka'tongtangode saknaanide dongpaa ine mesoka.

Dhubri-ni Pioneer Press chapa ka'e dak-chakahanina ukoba mittela.

Tura

24.5.1997

( K. M. Momin )

( Saljongpa )



## Duk Man'gipa Kaleng

Kaleng bi'sa namsranggijagipade ong'ja-chim. Indiba, da'nang, uni gisiko maia gnang darangan u'ina man'jaha, Gipin manderang ua bi'sa mai dakgipa ong'chongmotachim, jotton ka'e sandie niaba dongskajachim. Jeko dakoba, jeming rooba Kalengsa pangnan dosikode man'rongaiaaha. Dos dakchongmotgiparangde jokskae bang'a changon uasa sakgipinrangni dosiko chilchakna nangao ga'akaha. Dal'giparang ong'chong, chongiparang ong'chong ba rorimskagipa ripengrang ong'chong Kalengna ka'sachakani aro kakket dakani dongbrejachim. A'sel ong a changantion Kalengni biming nakatpaa aro uni bimingo namgija dakko site donrongachim.

Ma'a-pa sandie dokode ba nachil salode; ong'jaobo una mi on'gija okimu done sasti on'ode Kaleng namen duk man'a aro an'tangko tol'e on'giparangko namen ka'onangachim. Mong-songde, ua an'tangni kattako changsamangba saksamangba bebera'jani gimin gisikode namen duk man'achim. Indiba, bi'sajokona,

ua maikai dakode dosi on'arangoni jokgen aro maikai an'tangni kattako bebera'otna man'genchim uani gimin chanchioba maming cholko dakna gita u'isokjaha. Bang'a changrangan ua bi'saskarangko gele kataha; indiba ka'onanga aro duk ong'a namkalahaon uamang baksa nangrime ropilaiaha. Bi'saskaming roon ua saksan-roana bate kusi ong'batani ong'a ine ma'siaha. Idake uamang baksa ropaan maikai matnangaoni jokna man'genchim ua cholko sandinade gualaiaha. Mai dakgipa bi'sako ripeng dakgen aro sako gelgen Kaleng uko ma'eke dakna changjaha.

Pilak gipin bi'saskarangni gisepo Kaleng Nengkako namnikjabatachim maina uasa bang'a changon kajiako ong'katatrongachim. Indiba bang'a changon bi'saskarang Nengkana kene Kalengkosa tol'e on'rongachim. Uamangni an'tangna chakrongani gimin Nengkaba gisep gisep uamangni maiba duko ga'akon jok-atna jotton ka'skaachim.

Nengkani ma'a-pade aditan rang gam gna-nggipa ong'achim. Uamang jedakeba jamsade jamsa bilsio mi pakkamaiachim. Nokoara mande bang'ja, ma'a-pa aro Nengka baksa



cha'gipa me'chik sakgnisan dongaiachim. Indake iamang sakbongana chu'onga cha'ani gnangchim. Nengkana indakgipa obostao dongengon maming simbraani grichim.

Nengkani ma'apa depante saksamangmang dongaiani gimin una namen ka'sabeachim. Bi samitingonin ua jeko bi'a ukon ma'a-pa una on'ne kusi ong'atna jotton ka'rongachim. Uni gimin Nengkani duk dongan dongjachim. Pilak nangnikaniranko ua ma'a-paoniko man'na amachim. Indakgipa obostao Nengka dal'baaha. Una agreba ma'a-pa una chake aganrongani gimin Nengka skatang dakna cholko man'aha. Uni gimin Nengka chanchininggipa bi'sa ong'na tariako man'jaha. Ua rasong dakrongachim aro bi'saskarangko nama namja pilakkon dakdilorongachim, Jeba ong'bo; Nengka ka'donggi-pade ong'jachim maina ua an'tangko donnuna jotton ka'rongachim. Maiba a'sel ong'ahaode Nengka an'tangde kenrakgipa ong'e jesomoioaba an'tangko dosio ga'akatgija rakkina changachim. Iako dakna ua bi'sa skarangni dakchakachi chu'sokachim. Nengka saksande roamja; ua pangnan bi'saskarang baksasa jechi re'oba, jeo rooba dongrongachim. Bi'saskarangba unbaksa re'na namnika maina ua uamangna cha-

anirangko bree on'rongachim. Uni giminsa bi'saskarangba pangnan una chake gipinkosa matnange aganrongachim. Iarangna agreba Nengkani ma'a-paon songni bang'a manderangan janggi tangani gimin uni ma'a-pako gisik saatna ba uamangni depantena namgija bimingk man'atna sikjachim. Bang'gija manderangsan Nengkani namgijako parakna aro uko matnangna ka'sokaia; una agre gipinrangde sriksriksa aganmituaiachim.

Skul jokmanoa bi'sarang pangnan noktangtangchi joljol re'anggija ramarango neng'take ba banoba a'songe roe ba kal'grikesa noktangtangonade sokangrongachim. Wachi kariode uamang song sambako jokpakgipa chiring bi'sao jroe rona skul jokmano re'angchengrongaha. Uni ja'mano uamang sepango donggipa Rengsilpani barioniko te'brong, te'gatchu ba letchu cha'ue cha'rongachim. Rengsilpa iako namedaken u'ia indiba nikdikara dongjani gimin gisiko ka'onangarisan dongaingachim. Indiba cha'uanirangba dontongskaa dongjani gimin barioni letchu nangpagipade bon'angpi-lengahachim. Indake uni letchurangko palpae paisa bikotpana chanchisoade magna ong'nasi-engachim. Salsao Rengsilpa an'tangni bariko

nina re'baaha. Bi'sarang uko chel'aon niksoe sketbakket ong'one katsona chol ong'aha. Ja'pangona soko letchu bigil galdamako nike Rengsilpa timsrangna mangsongaha.

Indaken ua skul jokani somoio salgittamna kingking baritangona re'ange wa'gegrimo dongnue timaha. Salgittamnade bi'sarang re'bajaha indiba brigipa salo uamang gitchak rippet minenggipa letchu biterangko nikate namen mikbokaha aro chio aue romano cha'na skako chakchikna amjae ake cha'na re'bataiaha.

Uamangni ake cha'mitingo Rengsilpa wa'gegrimonin saiataha aro uamangko jaksikna man'adipet tarake rikbaaha. Bi'sarang sket sket ong'ondingdange kataha aro mitamrangde ong'onsrapjae dip dap chokone kataha. Indake Rengsilpani letchu ja'pangona sokangode bi'sarangde badeangskaaha. Indioba Rengsilpa ka'onangbee uamangko sairoroe rikangaha.

Bi'sarang chiringjoljol doe katangaha. Rengsilpa uamangko atte gonggasiko jako ra'e rikangaha. Adita chel'e rikangahaon Rengsilpa rong'te rimilao sa'mane chiosa mittal-bo'rak ga'aksrangaha. Uni jako atte ra'bitgipaba buringchina gobranga gita tang'angsrangaha.

Ua chakate ja'sku sa'dikako rim'roke, rong'toto asonge sairikana agre uamangko rikangna am-jaha. Bi'sarangba una kenen ga'akjoljol kat-joljol dakengachim. Indiba uni ga'ake, asong-riike dongako nikate<sup>7</sup>uamang ka'dingaba ka'dingaha. Indiba uamangba kenani gimin gam-beede ka'dingna pa'jaha.

Rengsilpa bi'sarangko skulni skigipana agane on'aha. Beanbebe, bi'sarangni kensoenga gitan skulo naparion uamangni skigipa bichal ka'na a'bachengaha. Bi'sarang man'adipet jechakaha. Uamangoniko altuae ku'rachakaniko-man'jawa ine skigipa u'ie ja'mano chonbatgipa bi'sako an'tangni sambaona re'bachina okamataha. Bi'sa chonbeengani gimin ua grapna gitik gitik dake kena gnanng skigipani sepangona re'baaha. Unon skigipa uko ka'sina ku-rangko jakkale skulni badia bi'sa. Rengsilpani barioniko letchu cha'uaha uko sing'aha. Indiba ua bi'sana kakketko aganna namen neng'beani ong'achim; maina ua kakketko aganne on'ode bi'saskarangni bimingko agane on'na nanggenchim aro uamang uko ja'mano doktimolskagenchim. Pilsa gita ua tol'e aganskaode uamangni skigipani jakchi dokako man'skagenchim. Bi'saskana kenan batani gimin a'ba-

chengode ua bi'sa jechakaha. Skigipa ka'onang-baaha aro ua bi'sako nachil saldengdenge ka'onangani ku'rangko jakkale gam'bee sing'ta-itaiaha. Unosa bi'sa kenan gape aro nachil salani sa dikachakna amjae kakketkon agane on'aha. Nengkachi skangon skiako man'e ua bi'sa Kalengko cha'udilgipa ine agane on'aha. Kaleng an'tangni bimingko aganako knae namen jechakaha indiba bi'sani aganako bebero'e skigipa ukon gipin bi'sarangna bate bilongbate betsmitchi dokaha. Uni ja'manoba skigipa Kalengko skul jokmano chipchangrikaha. Indake uamang sakgni skulo dongmitingo skigipa Kalengko manengtaiaha. Ia chango Kaleng an'tangni aganna mangsongako bon'en aganaha aro dakdilchongmotgipa Nengkako agane on'aha. Indiba skigipa uko bebero'na sikjae batesa manengdapaha. Unsalo Kaleng bi'sas-kangrangko ka'onangan maiba dakpilaha. Haida, ua uamangoniko saksamangko rama re'angpilmitingo nikode jedakeba dokchongmotgenchim. Indiba ua darangkoba ramao grongjahani gimin mamingkoba dakna man'jaha. Nokchina re'angpilmitingo Kaleng janggiltangko rim'roke niangaha. Ua chola ning'joljol dangdikate nion line sala gita maiba chinko

u'ipilaha aro srep srep dake sa'dikaniko ma'siaha. Uni gimin jedakeba an'tangni janggilo an'chi kampilaha ine chanchiaha; Nokona sokange bakan ua sriksrik ma'gipani janerako ra'e janggilchiko niataha aro beanbebe an'tangni janggilo brek mitchek dakpile an'chi kamani chinko nikaha. Ua asonge chanchion bi'saskarangni tol'e on'anina dukko man'bataha.

Unattamo Kaleng darangchiba rona ongkatanga grichim. Ua nokon napchipe dongaiaha. Meattamkoba ua on'titisan cha'aiachim. Waloba ua bakan lekka poraia gri palango tuari ja'mano tusijripangsrangaha. Indiba ua bakan mikrapilaiachim. Ma'gipa nokni kamrangko matchote ka'mano nokningchina napa ngoa Kalengni tuako nike poraijana manenge uko salchroaha. Indiba Kaleng poraijachim aro on'tisani ja'manon ua be'en rakjaenga gita palangona gitilangtaiaha. Ma'gipa uko manengtaiaha indiba Kaleng jrip jrip mamingkoba aganchakgija tuaiaha. Waltingahaoa ma'gipa simakaha aro maibakai tusiningna man'jaha. Apsan somoion uni sambao Kaleng tusina man'gija uchi bik uchik bik an'pilrurae dongengako nichae dongani ja'mano lentren so'ako saldoe nioa Kalengni janggilo brek mitchek

dakpile betsmitchi dokani an'chi kamani chin-ko nikaha. Unosa ua Kalengni obostako ma'sie sing'aha. Kaleng an'tangko skigipani dokako aganana agre mai gimin dokaha ukode aganjaha. Ma'gipaba ukode sing'jaha maina ua bakan walo chakate babilsona re'ange chiko ding'ataha. Unon ua soreao chiko ra'bae barao chi sime Kalengni janggilo adita ru'ute tape on'aha. Uni ja'manosa ua tusina man'aha:

Antisani ja'mano bi'sarang porikka seaha aro ua porikkao Kalengan an'tangni classo skanggipa ong'aha. Kaleng aro Nengka apsan Class II-o poraiengachim. Kalengni skanggipa ong'ahani gimin Nengka namen mikbuaha aro Kaleng aro skigipani kosako gipin bi'sarangni mikkango matnanganiko dakaha: lamangni gisepo pangnan susagrikani gisik dongkamaiaha. Uandake poraianioba changsao saksa, changgipino sakgipin dake classo skanggipa aro gni-gipa biaprangko ra'rongaha. Indake ong'on uamang saksa sakgipinko chonnike ba matnange agananirangko dakaha.

Bi'sarangni kal'susaanirango ba kal'grikani-rangoba Kaleng aro Nengkani meliani grichim. Uamang sakgni maming saloba apsan dolo

dongjachim. Indake kal'susaanirango dingtang dingtang dolo donge uamang saksa sakgipinko jaksikna ba warachakna jotton ka'aha. Bi'sarang Kaleng aro Nengkani gisepo ning'tua mitchigrikani aro saksa sakgipinko amna ba duko galonna jotton ka'ani kamrangko u'iaha

Salsao uamang skul ka'a neng'takmitingo robol kal'engachim. Indake maiba a'sel chon-beaonin jegrikani ong'katbaaha. Dolsa dolgipin baksa nangtinggrikahaon ja'manode Kaleng aro Nengkani giseposa jegrikani ong'aiaha maina uamang doltangtangna chake aganaha; Jeba ong'bo; uamang jegrikako dontonge kal'aniko a'bachengtaiaha. Indiba dolgnian robol kal'anina gisik nangbrejaha indiba kal'gipaska-ko saknaatnasa jotton ka'e marigrikesa kal'skaaha. Indake Kalengni dolko golgni amaha aro gol chipaantion Nengkani dol chonnike gol gol ine chrikaha. Indake ka'onange a'bachengtaion Kaleng an'tangan robolko ra'ange golsakode chi pepilaha. Uni dolni bi'sarang kusi ong'e gol gol ine ianpako chrikskaaha. Kal'aniko a'bachengtaion Kalengni doloniko Nengkani doloni bi'sa ja'gatengo tingaha. Tinga man'gipa bi'sa saknabee grapsi-mikosi 'dakpile chakaha. Indakmitingo Nengkade batesa an-



tangni dolko didiskae ka'dingstekaha; Kaleng  
 ka'onange Nengkani doloni bi'saskarangko  
 saknaatna ga'tingskaaha. Unon skul ka'pilani  
 skanggipa kantako dokaha. Uko knae dol  
 gnichinin bon'chote amna gita krengbate kal-  
 aha. Nengkani dol bang'bate amna jotton ka-  
 aha aro Kalengni dol golsa dongkuenggipako  
 apsan ong'atsrangna krengskaaha. Kaleng ja'a-  
 tangona robol til'baako man'soon uko bi'saska-  
 rangko ra'wengwatange Nengkani dolni gol  
 sepangona ra'angaha. Kaleng ia chango golsa  
 donggipako sulisrangna krengaha. Nengkaba  
 an'tangni dolko amatjana gisiko kreng nisoaha.  
 Maibakae Kalengni ja'aoni robol jokangaha aro  
 Nengkani sepangona til'angaha. Gol chipna  
 mangsonge Kaleng kreng rikangaha aro chad-  
 rapaha. Nengkaba watpaksojaha maina ua-  
 mang sakgnini gisepo ian mongsongbatgipa  
 somoi ine u'iaha. Sakgnian, uni gimin, an-  
 tangtangni bill gimikchi amna jotton ka'aha;  
 Kaleng chadrapoba jaksiksrapjaha. Nengkaba  
 an'tango bil donga gimikchi mikchippile mande-  
 tongtongsa robolko tingsoaiaha. Indake dakon  
 Kalengni oko robol bilonge nangaha. Indiba  
 bildapahani gimin Kaleng Nengkani kosakon  
 ga'akjetaiaha. Robolba Kalengni oko nange  
 til'angpilaha; Indiba golko rakkigipa bi'sa

jajabee ka'sine tang'anggipa robolko rim'rik-nan man'jaha. Indake bon'chotao Nengkani dolko amsrangjaoba aosan ong'aniona Kalengni gol chipachi ra'baaha. Kalengni dol kusi ong'bee gol gol ine chrikaha. Indiba Kaleng an'tangde ga'akaonin chakatna man'jaha. Ua oktangko rim'tomarisa saknabee gojronaha aro dikdiksani ja'manon sibokangaha. Nengka an'tangni dolko gol chipahaoba Kalengko saknaatna man'ahani gimin mamingba ong'nikgija gisiktango suk ong'aha.

Adita somoi re'angahaoba Kaleng il'eng siksakjahani gimin Nengkani gisiko kena napaha. Unon ua robol kal'ako dontonge an'tangni dolko skulchina katdilangaha. Uamang jentensa skigipani re'bana skang soksoaiaha. Skigipa skul noko nape niwingwange niahaon Kalengko nikjaha. Bichal ka'on bi'sarang kene Kalengde bachiba re'anga; uamang baksa dongja ine tol'e aganaha. Aditani ja'mano Kaleng kending kending re'ange skulona sokangaha. Skigipa uko niksoarion bachi roamanga uani gimin bichal ka'aha; Kaleng kakketkon aganaha aro bi'sarang jena man'jaha. Indiba maikai ja'manchakaha uani gimin bichal ka'on Kaleng an'tangko Nengka tingprete sibokangaha.

kataha ine agane on'aha. Nengka jechake-  
Kalengo dosiko galna jotton ka'aha. Indiba  
ianoako skigipa uni aganako ra'chakjaha. Jeba  
ong'bo; ia changode ua bi'sarangko sasti on'-  
jaha. Indiba uamangko manenge mikkangchi  
indaktaijachina aganaha.

Jagittamni ja'mano bi'sarang bilsini porik-  
kako setaiaha. Ia chango Nengka krenge  
poraiaha. Indiba Kalengde ma'gipa sachanga  
hani gimin name poraina man'pajaha. Uni  
gimin ua an'tangni man'akosan sena chol ong-  
paaiaha. Ircah ua doatako man'oba skang-  
gipa ong'e chadengna man'jaha aro gnigipa  
biapmangkoba man'gija gittamgipasan ong'ai-  
aha. Uni tang'onang nike skigipa Kalengko  
manengdapaha.

Unsalò Nengka gipin bi'sarang baksa rama-  
jol jol re'baengachim. Nengka an'tangni skang-  
gipa ong'ani gimin rasong chabeaha. Indiba  
ua uano dontongjaha maina ua Kalengko  
chonnika gnang aganna a'bachengaha. Kaleng  
bame on'gipa bi'sa ong'jachim. Je obostaoba  
ua Nengkakode warachakrongaiachim. Uni  
gimin uamang sakgnian saksa sakgipinko chon-  
nikgrike ja'mano jegrikani ong'srangaha. Ia  
chango bi'sarang darangnaba chakgija jrip jrip

niari dongaiaha. Jegrika amchakjee ja'mano Nengka aro Kaleng rim'grike dakgrikaona sokangsrangaha. Kaleng Nengkako stape, nol'e, uni skoo jaktome dokaha. Nengka krengprete Kalengni sinjetaoni jckaha aro bakan chadenge an'tangni jeponiko churiko sal'oke su'na jak engaha, Ei'sarang jajrengchake chrikaha. Kaleng chanch'sokjae janggilchi bakan chakate bitine kataha. Indiba Nengkani churi engang jak wingwangani gimin Kalengni jako nangbake on'tisa matchitahaon an'chi nakatbaaha. Kaleng bate ka'onangaha indiba ua da'o simsakbena nangaha. Ua churiko ra seke galna man'ode namkale doke watsranggen ine chanchiaha. Nengkaba jaktango churi dongani gimin wacharoroal a. Rang'san chasirape Kaleng Nengkani churi gnaanggipa jakko rim'aha, aro churiko ra'sekna jotton ka'aha. Indakmiting'o maibakae Nengkkani jakkoba churi nange adita bilonge mataha. An'tangni jakko matak'o nika aro an'chisrasra jokbaengako nika Nengka kena napaha. Upon Kaleng altuae Nengkani churiko ra'seke galatna man'aha. Nengka bakbakan an'tangni slet aro ki'taprangko jaksamsachi ra'e aro an'chi ong'enggipa jakpongko samgipinchi rim'kope grape bi'saskarangoni ma'a-pana aganna ta'rake katangaha.

Ianpako bi'saskarang Kalengnan chake aganaha maina uamangni mikkangon churiko bikote Kalengko su'na am'chengachim. Jeba ong'bo; uamang Nengkani grapako nike uko ka'pong ine chanchie namnikjaha.

Salgnini ja'mano songni manderang ia a'selni gimin melaaha. Nengkani ma'a-pa Kalengko dosi on'aha aro uano melapagipa bang'bata manderangan Nengkani ma'a-pana chake aganaha. Melaa chanchien Kaleng nima'a-pako alok galna aganaonan sokangpilaha. Jeba ong'bo; ia chango kema ka'kue changgipinode donchongnotjana tik ka'aha. Kaleng gita denggu bi'sako songo donchana man'jawa ine uamang matnangaha.

Kalengni ma'a-pa melaa kratcha'e jaksi chike dongpaana agre mamingkoba dakpana man'jachim. Uamangni aganako knachakgiparang bang'aba bangja'chim. Uni gimin ja'manode uamang jeko aganaoba jrip jrip dongsrangaiha.

Melaani ja'mano nokona sokbahaosa uamang an'tangtangni ka'onangako Kalengo oneskaaha. Ma'gipa aro pagipa Kalengko ka'onangbee sibokpile dokaha. Uamang Kalengni

agana kattarangko knachakjaha. Adita somoini ja'manoŝa Kaleng mikselfilaha. Unon ua asongaha. Indiba uni ka'tongo ianpako namen duk chipaha. Mongsongde, ua an'tangko dosi on'grimani gimin songni manderangni kattaŝo bebera'na man'jaha. Ua songni me'aparangko mitchina a'bachengaha. Minggipinara, ua an'tangni ma'a-pani ka'tong rakani gimin aro pangnaba an'tangna kakketnamangba chake aganpajani gimin duk man'aha. Ua ja'a jak rim'rokroroe an'tangni bilni kri ning'tue iarangni gimin chanchie niaha. Indake chanchien ja'mano Kaleng duk man'roroe ka'siksike grapsrangaha. An'tangna ka'sagipa ia a'gils ako darangba gri ine Kaleng bebera'na a'bachengaha. Songni manderangoni saksamangba una chake jaksi teng'samangkoba de'doatgipa grichim. Pile ua be'entangna adita gisik on'e rim'rokjol jol niaha aro dokani ripomanirangko nikaha.

Dokani sa'dikanade Kaleng gisik nangbrejaha. Ua iachango manderangni ka'sachakani donggijani giminsa chanchibate mikchi rue rue ong'katpile duk man'bataha. Manderang an'tangko maina inditana kingking miknenga aro tol'e on'na ska ? Maina uni kattakode chang-

samangmangba bebera'na sikja ? Bi'saskangna bate ua mai namjabatako dakahani gimin uko jinmarang mitchitena nanga ? Kaleng a'sel-rangko chanchibeoba u'isokjaha.

Gipin bi'sarangni ma'a-parangde detang-tangnase chaktoka; uamangde detangtangni kattakosa bebera'na sikaia. Detangtangni maiba doso ga'akode uamang pangnan gipin bi'saona dosko ga'pakatna jotton ka'a. Ua an'tangni ma'a-pako chanchie nion namen ding-tanganikosa nikskaaha. Uamangde uni kattako changsaba bebean ra'jachim aro una chake aganaba dongjachim. Bi'sa jinmani aganakode tol'omangba uamang bebera'na sikbata ine ua chanchiaha. Indiba mai a'selni gimin ? Maini gimin gipin ma'a-parang an'tangtangni dedrang-na chaka aro uamangni dosko chonata ? Kalengna iako ma'sina neng'beani ong'aha. Uni gimin ua chanchiaha, ia a'gilako maming saloba kakket dakode namnikako man'jawa. Tol'ako bebera'na tarigiparangsa ia a'gilsako gapa. Pilakan an'tangtangkosaka kakket ong'nikaia aro sakgipinni tol'e aganoba an'tang-tangchi namgni ong'eode uko ra'chakna kusi ong'tokaia. Indiba uni ma'a-pade indakeba ong'taija maina uamangde una changsamangba

chake aganan dongjachim. Uamang mai dakgipa manderang Kaleng chanchibeaba indiba ma'sina amjaha. Ua chanchiaha, una ka'sagipa ia a'gilsako darangba gri. Uni ma'a-pamangmangba una ka'saja. Atchiaoni da'alona kingking uamang una changsamangba ka'sae dakan dongja; uni kattako be'era'e changsaba una chake agankuja. Ia obostako da'o Kaleng ma'sina a'bachengaha aro indakgipa obostao ua mikkangchi janggi tangnaba neng'nikaha. Indiba una mai chol? Bi'sa mande maiko dakpana man'genchim? Kaleng nokoni kate dongna chanchiaha. Indiba ua saona kate bano donggen? Ia songo bano uni ma'drang gnang? Kaleng sandiaton u'ijaha, nokantioniko niatoba nikatjaha. Indiba ua mingsako da'o ma'sina a'bachengskaaha. Bang'bata songni nokrangan Nengkani bak nangegipararasa ong'achim. Uko roringipa bi'sarangba bang'batan Nengkani bak nanggiparangsa ine Kaleng da'o u'iaha. Unon Kaleng chanchina a'bachengtaiaha, indakesa pilakan Nengkanarara chaktokengama? Uni a'selsa uni ma'a-pa uko ka'donengama? Indake ong'ode ua ia biapo janggi tangna chol gri. Kaleng iarangko chanchibee be'entangni sa'dik, anirangkode gualpilaha. Ua bate batesa duk.



man'roroaha aro da'oba changsa uni mikrono mikchi nakatbataiaha. Ua changsa mikchitangko ipake galaha indiba uni mikchi tipjaha. Indiba ua neng'beahani gimin mikchi ong'ajol jolan tusi jripangaiaha.

Uni tusimitingon uni ma'gipa uko biap-tangona de'tome ra'ange palango tuataha. Kaleng an'tangko basakon de'tombaaha uko u'ijaha. Palango tuate ma'gipa uko janggilo an'chi kamgipa biaprango rim'rokengachim. Unosa ua an'penbae mikrakbaaha. Indiba uni mikkolode mikchian ran'kujachim. Ianpako ma'gipa ka'sachake uni'mikkoloni mikchiko ipakaha aro uni mikkangko rim'rokaha. Indake dakon Kaleng bate batesa grapna skaha aro uni mikononi mikchi rue rue ong'katbae, uni pegita okange biapo ga'akaha. Aditani ja'manode ia mikkang rim'tipe ka'siksike grapsrangaha. Kalneng duk ong'chongmotenga ine magipe rie uni mikkangko rim'roke una ka'saani attarangko aganaha. Indiba Kalengni duk omiangjaha; Ua ka'siksikchae dongaiaha.

Kaleng ma'gipako inaha, "Ai, na'song naina changsamangba angni katta bebera'ja? 'angnade angaba namgijako dakjachim indi-

mangba na'simang sakgipinni aganako bebera'e angko pangnan dokronga." Maina ?

"Mijaoba anga Nengkako churichi su'ja-chim batesa Nengkasa angko churichi su'na am'ani giminsa angara uko ra'seke galachim: Indiba ra'sekmitingo maibakae churi nangesa matnangaha. Angkoba bini churi mataha: Iakai, nibo. Bebegitaba anga baoniko churiko man'pagenchim ? Indimangba na'simang angni aganako bebera'na sikja."

Ma'gipa Kalengna ka'sachake duk man'-chakpilaha. Kalengni aganani bebe ong'jade ong'jaenga ine ua ma'siaha. Ua pangnan an'tangni aro segipani Kalengna daka kamrang-koba da'o chanchiatpile niaha. Indake dakon uamang sakgnian Kalengko doke-sate donana agrede uamangni ka'saani kamko mesokjaenga aro an'tangtangni depanteo bebera'jaenga ine nikataha.

Unon ma'gipa aganaha. "Nibo, Naleng; chinga nang'ni kattako bebera'ja ong'ja. Chinga nang'na ka'saja ine na'a chanchiama ? Indake ong'ja. An'chingo ma'drang bakska dongpaja. Sawa an'chingnara chakpagen. Gamba-rangba an'chingo dongpaja. Darangan an'chingkode

mikcheptokaia. Ong'anaba ong'janaba an'chingon dosikode gale donaigen. Dal'giparagipa dongpaosa an'chingna chakpagenchim. An'chingde chol gri; chakchike dongana agre maiko dakpagen ? Iarangni gimin chinga baditan duk man'a indiba chol gri ong'e jrip dongna ga'akaia. Nang' mama tangengkuode an'chingna chakpagipa dongpagenchim."

Kaleng da'osa obosta chong'motko ma'sina a'bachengaha. Indake uni gisiko duk ong'ani namkalaha. Ua an'tangna ma'a-pa ka'sajade ong'jaenga ine u'ie uni ka'tongoni jrimbegipa bal da'o ritchengkalanga gita ong'aha. Una agreba an'tangtangni ma'drang gri ong'an baksa rang, gam dongpajani a'selsa indakgipa obostarang ong'enga ine bebera'na a'bachengaha. Ua indakgipa obostaoni jokna cholko gisiktango sandiaha.

Unon Kaleng ma'gipana aganaha, "An'ching bachiba dongskana hai, ai ? Banobade an'chingna ka'sagipa dongnaba donga. Ia songode angade dongnan sikjaha. Angasa pangnan biming olkamaia; angasa pangnan dosi ong'kamaia. Dakchongmotgiparangde Nengkani dolrangsachim."

Ma'gipa mamingkoba aganchakagija gisik-

tango jrimbee chanchiari Kalengni mikkangko rim'rokari dongaiaha. Aditani ja'manosa ua ka'sine ka'saani ku'rangchi janggi tanganio maikai neng'nikanirang, dukrang aro kakket ong'janirang ba mitchianirangko man'a uarangni gimin bang'bee aganaha. Kaleng uni agana kattarangko knatime ja'mano tusi jripangaha.

Jumangchide Kaleng duk man'bee ma'a pa-ni nokoni katangbebeengaha. Ua an'tangni ba'rako chonbee katome songni salgipengchi dakanggipa ramako re'angaha. Ua saksan ong'oba maming kenani gisik uni ka'tongo dongjachim. Uni gisiko badia songona sokegen u'isoaniba grichim Ua an'tangni songoni kata-ngenga ukosan u'iaiaha. Adita re'angon ua apal-begipa, niwa nikwatsokpilgijagipa bakrako mikkangtango rang'san nikaha. Ua bakra gitan uni ramaba dakangachim. Bakrao ua burungna agre mamingkoba nikjachim. Pilakchiko niwilwale nioba buringna agre Kaleng mamingkoba nikjaha. On'tisa chadengdikani ja'mano Kaleng ua rama gitan chel'e re'angaha. Pile uni mikkango dal'begipa chibima dilsa nakataha. Ua chibima salaramoni saliramona gongge ske dake jokangachim. Chibima dal'a aro tu'beachim. Kaleng chibima rikamona re'bae

niaha aro ua chiko nionaton rikrak rikrak dake nikaha. Unon ua maikai ia chibimako batsot-na man'gen chanchiani ong'kataha. Niwilwale nioba ring ba wa'chap ba maming gitchonak-gipa bostuko ua man'jaha. Uni gimin Kaleng ia chibimako batsote re'na cholko man'jae rikamo chadenge maiko dakgen chanchichae dongaha. Ua jrobate re'na ka'sokjaha maina chibima dal'bea aro tu'beachim. Da'o nokchi re'pilnade ua sikjaha indiba mikkangchi re'angkuna gitaba una champengani nakataha. Uni gimin Kaleng duk man'e asonge chibimako nitate dongaha.

Adita ru'utani ja'mano uni janggilchini saoba uko pakkreo rim'dapeaha. Kaleng to'tro ong'e, an'pile chadengaha. Unon ua nikronggijagipa mandeko nikaha. Indakgipa mandeko aro ganding chindingko ua pangnaba nikku jachim. Indiba ia mandeni mikkango ka'sachakanian gapachim.

A'gital mande Kalengko nie sing'aha, "Kaleng, na'a saksan bachi re'enga? Nang'ma nang'pa nang'ko nikjae jajrenggnok. Na'a saksan, kenja?"

Kaleng duk ong'a gnang aganchakaha,

“Anga songoni aro ma'a-pani nokoni katenga. Ua songo angna ka'sagipa darangba dongja; angko mitchigipararasa. Anga bang'en dukko chakaha; indiba chakchikoba amjaha. Uni gimin gipin biapo dongon suk ong'kalgen ine chanchie nokoni katenga.”

A'gital mande ka'sachake inaha, “Indiba na'a bano donggen ? Na'a badia songo donggen ? Nang'ma nang'pana na'a ka'saja ? Uamangde nang'ni giminan namen jajrengenggnok. Nang'ma nang'pa baksa na'a dongna sikja ?”

Kaleng inaha, “Anga ai aro babana ka'saa. Uamang baksa dongnaba ska. Indiba uamang baksa dongode anga apsan songon dongkuna nanggen aro duk man'angkugen. Uni giminsa uamangko wate katna nangao ga'akaha.”

A'gital mande agantaiaha; “Atcha, indide, na'a ang' baksa re'na namnikgen ? Angni songode darangba nang'ko duk on'jawa. Na'a kusi ong'e dongna man'gen.”

Kaleng kusi ong'bee uko nidoë aganchakaha, “Indide anga nang' baksa re'na kusi ong'begen. Anga nang' baksa re'pagen. Indiba ia chibimako maikai batna man'gen ?”

Sakgipin aganchakaha, "O, na'a uni gimin-  
de jajrengnabe."

Unon ua a'gital mande Kalengni jakko  
rim'e chibimani dramona re'dilangaha. Kaleng  
jajrenga gnangsa re'angpaaha maina uade  
chibimako batsotna man'jawa ine chanchienga-  
chim.

Indiba dikdiksa somoina uamang re'ang-  
mitingon ua mandeni mikkang bimang ding-  
tangaha maina uko da'o sa'gre gitasa nikska-  
aha. Una agreba uni ganding chindingba  
gimikan gipok pil'tokaha. Kaleng aiao inmane  
ia mandeko niengachim. Indiba uni gisiko  
kenanide dongjachim. A'gital mande maming-  
koba agangija Kalengko ka'dingsmitesa niaiaha.  
Indake uamang chibimani dramona ong'onang-  
kuaha. Indiba uamang sakgnian tang'dona a'ba-  
chengaha. Kaleng badita chue tangdororoanga  
nditan aiao inmane ia mandeko nitataha.  
Indiba ua da'ona kingking katta mingsakoba  
agangija Kalengko ka'dingsmitarisa niaiaha.  
Indiba ua Kalengni jakko rim'akode watjaha.

Kaleng pangnaba bangbango bile nikpaku-  
achim. Uni gimin una da'o namen aiao in-  
nanani ong'achim. Ua kusi ong'aba ong'beaha;  
Kaleng ka'mao donggipa chibimako tangkani

siliting gita ro'dingding nionataha. Una agreba ua ka'mao donggipa bolrangko aro a'brirangko on'beesa nikataiaha. Chel'beao ua songni nokrangko bokrek boktek dake nikataha. Iarangko aiao inmanan taksa nimitingon uamang tang'dororoangaha. Unon uamang aram gisepona sokangaha aro uni ja'mano Kaleng niwilwaloba mamingkoba nikna man'jaha. Ua ka'mao aramrarakosa nikaiaha.

Uko jakbitgipa mande a'gitalde da'omangba maming kattakoba aḡankujachim. Indiba ua Kalengko ka'dingsmita gnangsa nie dongengachim. Indake uamang aramrangni kosako balboanguaha. K:lengba da'o kusi ong'rororangaha aro ua tusimitingoba ka'dingsmitaha. Uni tusinggipa mikkango da'o kusi ong'ani aro ka'dingsmitani nakataha. Indiba uni mikkolode samgnion mikchi gape dongkuengachim.

P:ingo ma'gipa Kalengko de'mesana dringona napangaha aro uako chakatchina okamaha. Indiba Kaleng jri jrip tusiari chakatgija dongaiaha. Uni gimin ma'gipa uko morekreke de'mesana chanchiaha. Indiba uni be'enko dangtapon suuri chikakosa u'iaha. Kalengde tusiaibai il'eng siksaka gri dongaiaha. Uni mik-



rononi mikgisep gita walo joke katanggipa  
mikchini ramako da'onaba nikna man'engkua-  
chim. Uni mikron samgnion da'oba on'ti-  
prakde mikchi sikkatengakuachim.

Unon ma'gipa uko gipake gam'bee grapaha.

— — —

## Tengre Me'chik

Indita ru'ute tuahaoba Tengre maming il'eng siksakagri palangon dongaiaha. Ua ku'sik-waring on'aba dongjachim. Tom'tome mittale tue dongana agre ua maming dakaba dongtaijachim. Uni be'enni kosako nambegipa ba'rako pindapachim. Uni ka'tong tiktako gitchakgipa, nitobee balchichaenggipa golap bibal balgittamko saoba ra'bae doneaha. Indiba Tengre iarangna maming simsakaniko rektek mesokjachim; Ua mikchipari tom'tome tue dongaiaha. Uni indake dakani gimin uko duule asongenggipa manderang, uni ma'a paa, ma'drang, songsulrang aro uni namnikgipa ripengskarang mamingko dakna gita cholkon man'jaha. Indake pringoni da'o salbelasa ong'pilahaoba Tengre mikrontangko oan' dongkujachim. Ua ka'onangenggipa gita, jrip-mittip, ku'siktangko ojaha; kenbeenggipa gita ua il'eng-siksakjaha.

Uko dongdulenggipa manderangni mikk-ango duk aro jajrenganian gapachim. Ia me-

chik maina ia salde indake dakronggijako daka !  
Mai balwako rang'sitman'e, badia chiringni  
chiko ringgake, mai biteko cha'mane uni gisik  
aro dakbewal dingtangsrangjok. Sawa una  
mai budiko skie on'jok. Manderang jajreng  
chanchiana agre mamingkoba dakna man'jajok.

Gisep gisep uko asongdulenggipa mande-  
rangoni ku'sa ku'gni agana kattana agre nok-  
dringo darangan jara, ku'ma gita, jrip donga-  
chim. Indita bang'gipa manderang jrip jrip  
donganiba uko nikgiparangnade aiao inmanani  
ong'taiachim. Pangna ka'dinge roronggipa  
uni songsulrang, uni rorimbegipa ripengrang  
ia salo mai ong'tokaha ? Haida uamang tusie  
dongenggipa Tengreko mikrakatna kenengakon.

Tengreni ma'gipa buchumade, da'nang, uni  
skopango palang rikingo sko done ka'siksike  
dongengachim. Uni mikkangde, da'nang, duk  
ong'ani giminan simaming ram'aming dakpil-  
aha. Uni pe samgnion mikchi jokonbaaniko  
chin dake chingchate namen nikna man'pila-  
chim. Tengreni tuenggipa palangni sambengon  
pagipaba chadenge uko nie dongengachim. Uni  
mikkangoba mikchian rue rue tipchanggijan  
jokbaengachim. Indakmitingo, nokdringni  
a'palo, sarao asongenggipa manderang aro uko

u'igiparangba gisiko dongtogija duk man'-paengachim. Tengrena ia salo mai ong'aha. Uamang ku'misichisa uni gimin agangrike dongengachim.

Unon Tengreni tuenggipa nokdringni samsachini grapani ku'rangko knaaha. Ua ku'rang namen ka'oksiani ong'achim. Indakgipa ku'rangko knasoania Tengreni tugipa dringo dongenggipa pilak manderangni ka'tongko su'pekeaha Manderangni ka'tong be'na a'bachengaha. Mongsongde, Tengreni ma'gipaan ka a chakna amjae an'tangni demechikni mik'rangko rim'roke gam'e grapsrangaha. Gipin me'chikmarangba chakchikna amjae au au grapna a'bachengaha. Mikchi soling solang sepango chadengenggipa pagipaba ka a chakna amjae ka'siksike, mik'rangtangko rim'tipe grapsrangaha. Indiba ua bakan an'tangtangni turam nokdringchi napange palangtango tuegam'atbregija grapaha. Uko ka'dimeatna darangba nokdringona napanggipaba dongskajachim.

Indake jija ji'ja grapani ku'rangko knaon Tengrena mikrakbaanina kenchakani ong'pilaha. Indioba, da'nang, Tengrede uan, uan; tusiabaibai dongaiaha. Ua tusidapenggipa gita mamingkoba u'igija, be'ntangmangmangkoba

il'eng-siksakgija, apsan biapon dongaiaha. Uni be'enko namedake nitate dongode ka'tongko rang'sitengni gita mojim mojim dake nikaia-chim. Indiba ua maina Il'engja. Uni ma'a-pa, ma'drang aco songsulrangni duk man'aniko ua mamingba ong'nikjaengama ? Uko asongdulenggipa manderangni ka'beanirangko Tengre u'ipaenggenchimma ? Sawa uko agane on'na amgenchim ? Uamangni ma'ringaniranga una mai ong'epaenggenchim ? Darangba u'ina man'jaha.

Haida, sawa u'ia; Tengre ma a-pani ka'beanina dukde man'chakenggenchim. Uni ka'tongo uamangni jrimbegipa janggini balko chilchake uamangna ka'dimeaniko ra'bana man'ode ura mairongpile katchaani ong'genchim. Iakoba, chanchie niana agre, darangna u'israngnade man'jaha.

Tengre ru'uta salrangna saaha. Uni ma'a-pa uko tange rakkina man'paarok ine chanchie ka'nilstapaha. Uamang ru'uta salrangna samrangko jakkale, cha'o cha'napgija, gisiko tikkit, tikkit dongtojae, roo rosiksake, walo tusinagija Tengreko mikkang rim'rokani walko seng'at-rongachim. Iarangko Tengre an'tangba namem.

u'ia aro ua da'o iarangko gisiktango jojrang-jrang rongtalbeen nikatenggenchim.

Jeba ong'bo; ka'nilanirang pangnande chu'soka ong'ja aro iarang da'o badeangaha. Ua-mangni krenge jotton ka'anirang maming namgniko ra'bajaon maikai chaktogija dukchi wep-ripako man'aha iako Tengre an'tangba nikpa-enggenchim. Indaken ua uamang baksa kalim-rimpaenggenchim. Indiba ukoba sawa u'ia ? Tengrena agre iarangko tale agane on'na man'gipa ia a'gilsako darangba dongja; indiba uara da'o ku'sik onan simsakani griskajok. Uni ku'rangko ia a'gilsako darangba knataina ka'dongani dongjaha. Uni kusi ong'gipa mikkangko darangnaba mesokani ong'jawaha. Manderangsa uni mikkangko aro knatogipa ku'rangko gisiktangtango chipe ra'aignok. Una agrede. Tengre an'tangde mamingkoba dakjawaha.

Tangrikenggipa manderangsa ka'a be'a, grapa aro skima; indiba Tengrede indake ong'jachim. Ua an'tangde asongdule duk man'enggipa aro mikchi rue rue ong'katbaenggipa mikkangrangko nike maikon chanchipil-enggenchim. Manderangni indake dakako nike

haida ua gisiko dongtopiljaengnaba dongachim. Ua an'tangde an'tangko siaha ine chanchijaenggenchim. Sia mai daka ukoba ua an'tangde u'ijaenggenchim. Tengre an'tangde jumang nikengasa ine chanchienggenchim. Indiba bang-bea manderangni tom'dakako nike haida uni gisikoba maiba dongtogijanide nakatenggenchim. Mongsongbatede, ua an'tangni bimangko name palango tuate, ba'ra nambeako pindape donako nike gisikode dongtojaenggenchim. Biade golap bibalko namniksranga aro an'tangni ka'tongo bibal balgittamko nikate, haida, uarangna m'kbokatengnaba gnangchim. Ua an'tangni golap bibalrangko jako ra'e, similgipe, knio pote ba lekkao dape donrongako da'o rang'san gisik ra'atenggenchim.

Haida, ua an'tangni ma'a-pa, budepa buchumako gale re angnade ka'pakangenggenchim. Pilsa gitara noktangni manderangko an'tang baksa rimangpanaba uni gisiko skanide dongenggenchim. Ja'pingtango rime roronggipa jonggipa chonbatgipakoba ua watangnade ka'pakangenggenchim. Una agreba an'tangni ja'manchi ma'a-pa, jong'gipa nogiparangko sawa nirok-sandigen uarangni giminba chanchibee jajrenga gnangsa Tengre watangenggenchim. Iarangko

Tengresan rongtale agane on'na mangenchim.  
Indiba uara da'ode bimangarisanjok.

Mongsongde, ua saksan ripeng-baju gri mandeska baksa dongrimaoni rang'san ekangna nangahani gimin uni gisiko baditan dongtogi-janiba ong'enggenchim. Haida, Tengre iani gimin an'tangan namen tala aro somoi soko sakantian maming u'irikgija indake dingtanganio ga'akgen ine ma'sianio ua ka'dimeaniko man'pilengnaba dongachim. Iarangni giminba manderang chanchie dongana agre u'israngnade man'jaha.

Biade me'chik bi'sa ong'oba darangba re'dilgipa grisa saksanmangmang re'angna nangaiaha. Pilak a'gilsakni chanchianirang aro ong'anirangko badee ua da'o gital sigijagipa jang-giko man'skae dintang biaposa dongskagnok. Ia a'gilsak namgijagipa biapo, saknaani, dukni aro jajrengani songo maina dongchagen ? So'so jengjeng, dakgrik-dinggrikani aro cha'asia aro sabisian gapgipa a'songo maina duk chakchagen ? Gipinchi re'ange uarangoni joke dongon nambata.

Uni gimin Tengrede songreangaha. Ua ripengskarangni, ma'drangni aro ma'a-pani beng'aniko manigija saksan re'na tarie da'o



uamangni nikrikgijaan badeangaha. Ua sorok-pa'angdingdingko nipilmanggija, rama tongtong niarisa re'angaingjok. Rama a'pal jaoba re'na re'toa; buring diltuoba dikprade ong'ja; saksan ong'aioba mikkutengteng dakja. Indake iarangko pilakkon badeangmano ua namgipa biapona sokangaha. Rama samtangtangchin apalbegipa aro tu'begipa a'kuang gnanggipa biapona sok-eon niwatna niwattobeachim. Tengre iano dongdike aditan balwa ringe neng'takaha, Ua salgrochiko apalbee niwatna man'achim. Indaken ua suk ong'bee sulsul salgrochiko nirorangaha. Chel'beao a'biding ja'reto ua bokrek boktek dake nokrangko nikataha. Badiaan uni nok ong'enggenchim Tengre chanchie niaha indiba u'isokjaha. Una agraba ua a'ba cha-gitcham porongrong dake donggipa biaprangkoba nikataha. Salgipengchiko an'pile niatskaon ua ka'mao a'pal rarakosa nikataiaha. Beben, a'brirang gnang indiba salgroo donggipa a'brirang gita uarangde chupajachim. Chubatao chadenge niatengani gimin Tengre ua a'brirang baditan chupaenggenchim uko chanchie nion u'inade man'jaha. Apalo ge'a gamanirangko Tengre nikataha aro song dam bri dambongamangko a'brisi giseprangoniko nikatna man'achim. Tengre ua songrangni giminba dikdik-

sa chanchie niataha. Indiba mai songrangan ong'enggenchim ukode u'ina man'jaha. Niwat-rikrikange Tengre chel'beao teng'chakenggipa chibimakoba nikataha. Ua chibima salgroomi a'bachenge apalbegipa a'palko duule jokdule salgipengchina rikamjoljol jokangachim. Salgipeng salaramchipako a'kuangni bakon nina nitoriri dake a'ningo gadang gadang dake dingtang dingtang ro'ongrangni bakrangko nitoriri nikatna man'achim. Rong'chun-ni aro koilani ro'ongrangko ua be'wakgimin a'kuangni bako-niko nikatna man'achim. Indakgipa nikani-rangko gisik nange niroroe Tengre adita somo-inade an'tangkon gualpilaha gita ong'aha.

Adita dongani ja'mano ua rangsan maikoba gisik ra'gitika gita chadengaha aro ganatangko dokpronge re'na re'chakattaiaha. Uni re'a mikkangao ja'ku kolgrikman chel'ao a'tinggak daka dongachim aro ua gitan ramako dakangachim. Rama samtangtangchin balgragimin kasirangni balkasin balsri balana dokdek dokdek dake, duk, suk u'ipagija baljing-jangana Tengre kusi ong'chakpae, an'tangni dongalbagimin duk ong'enggipa ma'drangko guala gita ong'e ramajoljol re'angaha. Una agreba ramasam jaksokao rittak rittak baleng-

gipa dikge bibalranekoba ua nijoljolge aro mitamko ake jako ra'e uarangko name niroroe re'angaha.

Indakmiting somoio Tengreni mikkango maming kenaniko nikjachim. Uni gisik<sup>o</sup> maming sintianiba nabaa dongjachim. Indake uni mikkango ka'dimeani gapachim. Tengre mamingnaba simsakagri saksan re'angaiaha. Ua bakroe re'angahaoba darangkoba grongtaijachim. Jeba ong'bo; ua an'tangan ia ramako pangnaba re'e nikkujani gimin banona sokahachim ukoba u'ijaenggenchim. Indiba indakarangna Tengreni gisiko maming chanchianiba dongskajachim. Rama re'gipade pangnan soknakgipa biapni gimin chanchironga aro badita chel'a, ramao mai mai kengni ba kusi ong'ani donga uarangkoba sandia. Indiba Tengrede iarangna chanchiaba dongtaijachim. Haida, ua iarangni gimin skangon chanchiman'aha aro u'isoaha; ong'jaode iarangni gimin chanchidugaen da'ode dontongskaaha. Iarangko rongtale agane on'nakgipade a'gilsakode dongjaha. Tengresan uarangni giminde tale aganna man'genchim, indiba biara da'o re'angskaengaha aro pil'bajawaha.

Basakobasa ua an'tangni watgalbagipa ka'-

sagimin ma'a-pa, jong-ada, no-abi, ma'drang aro ripengskaranko gisik ra'ate uamangko niktaina sikgen. Un salosa Tengreni gisik siksik saksak dongtojawaha. Unsalo uko ka'dimeatnakgipa aso unbaksa agangriknakgipa darangba dongjawaha. Saksansa Tengre mikkutengteng dongna nangaignok !

Indakgipa me'tra bi'sa, Tengre dal'aha aro uni ma'a-pa uni jakmako cha'pano namen ka'dongani dongachim. Ua skulko matchote poraiani ja'mano ma'a-pako bilsu gittammangnadachakengahachim. Indiba da'o uni indakani-ko bon'chongdikataha. Uni ma'a-pa sao ka'dong pagnok ?

Tengre bi'sa nangipa ong'achim. Beben, uni mikkang bimang nitobegipade ong'ja; indiba antangnade kraa gitan dongpaa. Uni bimang ro'renga aro an'gila sakchigrik ong'achim. Ua kni ro'e dona aro uko sakjringe bikrongachim.

Gipin me'chikrang gita Tengre denggu-masu dakgipaba ong'achim. Ua sontolgipa bi'sa ong'achim. Uni jegrik-ingrikakoba darangan knaa grichim. Da'odipet darangna mikchaa ba samingba roa inakoba knakujachim, Haida, uni gisiko sanaba miksongade dongpaengnaba

dongachim. Indiba ua uko parakaba dongjani gimin darangba u'ina man'jaha. Tengre kamtangna nisigipa ong'ja; batesa simsake aro gisiko nange ka'achim. Kam ka'e je on'tisa man'pækon ua chu'ongnikaiachim aro uachin ma'a-pako dakchake kusi ong'aniko man'engachim. Kam jokbae attam salniangachibarade ua panggan pagipani chibol kita rikamo golap pulrangko ge'e uarangni bibalrangko niroroe an'tangni ripengskarang baksa golpo ka'rongachim.

Tengreni ma'a-pa una sako sing'e on'gen an'tangtangde ru'uta salrangonin mitu mitu agangrikengahachim. Tengre an'tangba ma'a-pani chanchiako u'ichipa; indiba ua an'tangde maikon iarangni gimin chanchienggenchim uko parake on'aba dongsakajachim.

Kamtangchi re'angna skang ua salantion nokni kamrangko man'adipet ka'e donangrongachim. Nok itroke, sara rongtalate, rochakram nokdringko nitoe tarie an'tangni namnikgipa golap bibalrangko ake jangchio dongipa tableo pul donchakanio uarangko nitoe tarie donanirara uni gisikko namen ka'srokatachim. Iarangko dakmane uni auani somoi ong'ahaode panggan an'tangni namnikgipa gitrangni sulrangko

himhimaniera salsaba chotchangjachim. Indakgipa kusi ong'ani salrangko haida Tengre man'taina nengnok.

Indake Tengre atchiaoni bilsi kolgrikni jabrimangko ia a'gilsako re'ataha. Mandeni tangrongbewal gita una bang'a bilsirang gnang-pitichim. Se kime, desa ba'e, nokdan-baku rike, budepa buchumae janggi tangrimani salrang una bang'en dongkuengachim. Indiba, da'nang, Tengre iarangko wate dingtangangchangna nangaha. Manda an'tangni janggi tanganiko basakon bon'gen u'isoja. Mitam janggi tanganina tarisoa; mitam tarisoomangba cholkon man'paja. Mitamrangna magnasa tarisoaia. Bang'bata manderangan cholgrioba budepa buchumae, nang'skime janggi tanga. Indakgiparang ia a'gilsako janggi tangnan neng'nikpila aro sina ma'ringpila. Indiba mandeni skani gita sia mikkang pa'aigende ong'ja. Sanabasa ua rang'gitik chanchisogijan somoio, cha'u gita, nabaaia aro beanbebe, mandeni gamchatbatsranggipa gamko cha'ue ra'anga. Indake ong'ahaon mande uko tangmitingo man'piltaina ka'dongani dongja. Lakni lak tangkarangko on'e brena am'genchimoba uko darangba palnaba man'jawachim;

A'gilsakni manderang ia cha'uko namen ma'sia aro bang'an uko chagrongna kenchongmota. Indiba ia cha'uko rim'na maming cholko man'ja aro engtogija obostao ga'aka. Ua jaksikahaode grape aro sikkime dongana agre maiko dakna ama ?

Ia apsan obostao Tengre salsao ga'akha: Ua an'tangni gam-janggikon cha'uate gimaatsrangaha. Indake ua an'tangni gamchatanikon bon'atsrangaha. Da'ode manderang uko gamchatnik jawaha ine Tengre an'tangan u'iaha. Beben, uni nama gunrangko manderang agane dongkugen; indiba uamang uko mandeska gita chanjawaha. Indake ong'on Tengre maina uamangni mikkango kratcha'e, jaksi chike, dongkugen ? Gamchata gri ra'song be'e manderangni mikkango maina an'tangko onate dongkugen ? Una mai man'dapani aro namgni dongkua ? Saksan, dingtang dongon nambata ine Tengre chanchiaha: Uni gimin ua manderangoni ma'eke dingtang janggi tang-aniko dakna biap gipinchi re'angaha.

---

## Kaljanna Donsogimin Kopal

A'songtangko adita a'chik dobaon Kaljan dingtanggrikaniko u'iaha. Adita doanguon ua mikkangtango a'bingko matchotsrangnasiako nike krengbate doangaha. Indake a'gitoko chadengoa mikkangtango balsri balenggipa a'brini balwara maikai ka'sina aro a'kaweo a'palni balwara maikai ding'bilbilate dongtaoja ua tosusana a'bachengaha:

Janggilchiko an'pilate nionaton ua niwatnikwatsokpilijagipa a'kaweo mi ge'na tokrang tokchang hal weani chinko nikataha. Mitam biaprango tangsekgilgil dake nambee mirang cha'baengaha. Mitam biaprangode a'ararasa gitchakprang dongaikuengachim. Una agreba ua a'pal jangchio aratsijosijo dake gongge ske dake tarigipa donggeo jokangenggipa chikoba nikataha. Badiaba badiaba biapode sal ja'dil teng'ani nangchakani gimin uko mikbrappile boke nikatachim Kaljan niroroangkue adita chel'ao bolgrimgrim dake donggipa biapkoba nikataha aro uarangni gisepo adita chonchon-



gipa am'pangni nckrangkoba nikatna man'achim.

Indakgipa nikaniko Kaljan nikkuja ong'jachim. Indiba ua pangnan songjinmao dongrongani gimin unade ian nitoani ong'pilaha, aro iarangko dikdiksana ua ka'sroke niwate roaha. Unon uni gisiko chanchiani nabaaha. Songjinmako tosusaate njode uni nikatenogipa biap aro obosta baditan ding'anggrika. Dal'dalbegipa aro gadangni gadang rikgimin ittani nokrang, namnambegipa sorokrang, manderangni gisikko salna nitobee tarigimin dokanrang aro uarango palgipa namnamgipa bosturang, ma'manti re'ani cholrang aro bang'begipa manderang songjinmarangode donga. Incake song aro songjinma baksa tosusagrikna neng'ani ong'pila. Songara song ; songjinmara songjinma. Iarangko tosusagrike namgni dongja ine Kaljan chanchipilaha aro an'tangni ramako re'angaha. Adita re'angtaion ua bolgrimona sokangaha. Uni gimin ua salakkimna bol ja'pangko altuaen man'aha; gitok ma'siatna ua changgnimang chiring bi'sako ga'bataha.

A'brini ramade namade ong'ja, doa, ong'ona dakaia; gongge ske ramaba apchona. Mitamde buring dika aro ru'atrarasa. Unbak-

saba banoba banobade matcha, mongma ba matbil roram biap kengnisa. Indiba badiaba biaprangode a'chik doa matchotahaode an'sengriri balwa ka'sin ringe, chu'chan chu'chan dakgipa a'bidingrangko niwate rona suk ong'a. Basakobade bokkrokro dake ga'akonenggipa chibimani chiko nikatoba kusi ong'chakpila. Ong'jaoba ramasamni misi gonggot ba'jingj'ngengako ba mirangni silbeako, tangsekgilgil chaenggipa mirangko chiringkoloni baldobagipa balwa baldapangode groop dake gongdolanga-ko nirike roeba gisiko suk ong'aniko man'a. Indakgipa biaprango dongode a'songtangna ka'saani gisik nabachong'motaia aro dingol ran'angahaode rama re'ani neng'akon guala gita ong'pilaia.

A'kaweode, ramamangmangde srongdingding dakaia a'brio gita wena-dem'a dongja. Indiba a'kaweni ramako re'ode ja'wek ja'wek dake sokningja gita nikpilaia. Unbaksa name tarikujaoe a'dimurara, ba wachiode, a'dukbekrara ja'skuskuko re'na nanga. Indakako re'na namen man'dikbeani kattasa. Kaljan iarangkoba chanchijoljole re'angengachim.

Ua an'tangni keenggipa jolako pakkre samsachina sreataha aro chattako jakrachi

ra'skae uko gol'dik gita jakkale su'chanjoljole  
a'ding dakgipa ramako doangaha;

Kaljan atchiram songtangona bilsisnini  
ja'mano re'angpilengachim. Ua songtangni  
gimin mai ong'genggen uko chanchiate nioba  
namedake chanchina man'jaha. Jeba ong'bo;  
ua an'tangni ma'a-pako aro songni manderang-  
ko aro ripengskaranko grongnade kusi ong'en  
re'angengachim. Ua maikai mikkangchi janggi  
tanggen ukode chanchia dongkujachim. Porik-  
kaode pass ong'na nanggen ukode Kaljan kim-  
kiman chanchie jadokmangna gisik nangbeen  
poraiaha. Indake poraianiaara una namgipa  
biteko ra'bagen ine ua B. A. porikka semanon  
ma'siaha. Porikka semanahaode poraina nang-  
jawahani gimin suk ong'e rona man'gnok ine  
ka'donge Kaljan kusi ong'soengachim. Indiba  
matchotbebeahaoa uni gisik maiba dakaiaha.  
Porikka ja'mano suk ong'e rognok ine ching-  
soara tik ong'jaha; batesa porikka semitingon  
aro poraia jakchakjamitingon uni gisiko suk  
ong'ani donga ine da'o Kaljan ma'siaha.  
Mandeara miksongatangna jaktango kam griode  
kusi ong'na man'ja. Indaken ua porikka sema-  
nahaoba maikoba dakna gitik maikoba porai-  
kuna gitik dake donganiara uko dongdikatba-

taha. Uni giminsa Kaljan songtangko ru'uta bilsirangni ja'mano niktaina sikjole re'basrang-aha. Ma'a-pako, songni manderangko aro ripengskarangko gronge uamang baksa dikdik-sana songo dongode dingtang janggi tanganiko man'gen ine kusi ong'aha.

Unon Kaljan an'tangni chonmiting salrango ripengskarang baksa Mikkong chibima rikamo, an'chengo mande dake ba jamdap pine roarangko gisik ra'ataha. Ua chibima dal'achim aro ta'arakbeachim. Uni gimin uamang rikamo roana agre jrobatnade pa'jachim. Kaljan an'tangni rong'toto asonge chibimani ta'rake jokangako nirike roako da'o gisik ra'ataha. Mong-songbate ua maikai chisamo asonge ta'arakbee jok-onangenggipa chibimani chipakkore nirikrongachim uko gisik ra'aha. An'tangni sambao ka'spu bokbak bokbak dake, chrokjol jolangenggipa chiko asongdate adita somoina biap damsana gisik on'e nitate dongode an'tangkon chijol jol tang'doangskenga gita nikpilachim. Indake nikani pangnan uko suk ong'atrongachim. Uni gimin ua asongdate ta'rake jokangenggipa chipakkorerangko nie dongrongachim. Iako dake nitaina Kaljan gisiko skani nabaaha. Una agreba ua minggipin dal'bea a'sel ong'aniko

gisik ra'dapaha. Wachikarini salsao uamang sakbri, Genang, Bakal, solte aro Kaljan dake ua chibimao rotainan re'angachim. Unsalo uamang dakronga gita ong'gija chio adita jroe roaha aro Genang chibimako jrobate nalsaona sokangaha. Ua rasong dake gipinrangko an'tang gita chibimako jrobatbachina aganataha. Indiba uamang pa'jae chibima rikamosa kalgrike dongaiaha. Adita nichake darangba pagijako nikon Genang jrobatbataiaha aro ripengtangrangni sepangona sokbaengahachim. Indiba ua ua rang'san chiningchi napangaha. Gipinrang chiningjol jol jrobae uamangko kal'aknasa dakenga ine chanchie a'gaona gakate uko nisoaha. Adita ru'ute nisooba uamang Genangni mikkangko niksojaha. Unon uamang jajrengang uko gam'e okamtaitaiaha. Indiba chibimani gam'anina agre mamingkoba knajachim. Uni gimin uamang kene songona katange obosta ong'ako agane on'aha. Songni manderang bakan biapona chabae chi ripe sandiaha. Indiba Genangni bimangko man'jaha. Unsal intal Kaljan an'tangni namnikbegipa ripengko gimataha aro uko niktaijaha. Bi'sani kri duk man'e ua untal ua biapona re'ba re'angtaijaha. An'tangni namnikbegipa ripengko chonmitingon

gimaataniara maikai rasong griani ong'a ine Kaljan duk ong'a gnang chanchiaha. Indaken iani bidingo chanchianiko ua bon'chongdikataha.

Indiba uni ka'tongo minggipin dik dake nabaskaaha. Bilsisnina skang ua an'tangni lekka skigipa, me'chik bi'sa, Seringbalni gimin chanchiani ong'katskaaha. Unomitingde Seringbalara namen chongbeengachim. Indiba ua lekka-porana gisik nanga aro sontolachim. Kaljan an'tangni ua me'chik bi'sana skie on'anirangko aro an'tangni golpo aganarangna uni gisik nangbee knatimanirangko gisik ra'ataha. Salsao Seringbal ma'gipa Kaljanna demechiktangko kal'ake ettalaha. Jola jola Kaljanba aganatpaaha. Untal Seringbal Kaljanna kratcha'na a'bachengaha aro unbaksa melina man'jaha:

Haida, da'ode Seringbal me'tra bi'sa sokenggnok, u'ipil janaba dongaha ine Kaljan chanchiaha maina da'orereni bi'sarangde dal'ningbea aro me'chik bi'sarangde dal'ningbata. Ua mai dakgipa me'chik ong'enggnokchim ukoba Kaljan nikna skaha. Pile Kaljan uni ma'apani obostakoba chanchiate niaha. Seringbalni ma'a-paba man'e cha'ade ong'paja, an'tangtang

gita dakpaaia. Beben, manderangkode nama gita nika. Songsul nokripengba bang'a. Indíba uara mai ? Una mai namgni ? Man'e cha'oba kangal ong'oba uko maina sandipaa ? Iakoba Kaljan an'tangan chanchipile nitaiaha.

Iarangko chanchien Kaljan gipin songni ramakosa melsamang ong'nasipile re'angaha. Unon ua ramao Solteko grongaha.

"Kaljan ?"

"Oe. Na'ara sawasa; angade u'ijajokke !"

"Baap : Solteko u'ijajok ?"

"Aiao : Bilongen dingtangbe jokara mai-kai u'ikugen ?"

"Mai, songchi re'engama ?"

"Oechim; songko nokko nikgijaba ru'utbe-jok inesa dikdiksa roe katna ine re'baenga."

Solte, "Angan indake chanchienga."

Kaljan, "Mai, ama appamang namengama ?"

Solte, "Haidade, angaba u'ijane; angara songgipinosa jok."

Kaljan, "Mai, jik ra'srang jok."

Solte, "Oe, da'skari changsaon."

Kaljan, "Ooo."

Solte, "Na'ara bilsisni jila roajokona a'songtangkon gualpilengjokde !"

Kaljan, "Maidakesa songtang noktangoara gualgnoksa."

Solte, "Gualja : Iara maisa; ia nang'ni songni ramane ?"

Kaljan, "Ia songni rama ong'jama ?"

Solte, "Na'ade Jamdapgrechinasa melsamangde badeengjok."

Kaljan, "Che : Che : Iankonba ?"

Solte, "Ong'paengboda. Indiba re'ange niaibo. Haida na'ade sokangainaba donga."

Kaljan, "Che : Ong'jaode maina re'kugensa; pil'aignok."

Solte, "Hai damsan; angaba Majong gittimchi re'enga. Tongsanade apsangenba."

Indake uamang golpo ka'jol jole re'ange Kaljanni re'ekbagipa biapona sokaha aro Kaljan Solteko mittele uamang sakgnian ramatangtangchina an'pile re'angaha. Adita re'angon dikmeattam so'na a'bachengaha. Salnapnasiani somoio dakronga gita chenggari ka'sirokrok satataha. A'bri bolkambeo do'chelu cheluataha. Indake attam wal sokbaenganina salni napan-



gao saliramchi gitchak gitchak saljagring gisep-rango aram balboara uko ka'pak ka'pak dakat-manpilaha. Indioba ua buiring diltuako re ang-taion andalsimsim dakna a'bachengaha. Pilak-chin a'paode srik ritdiksajok. Kena gnanng Kaljan gong'rakbee re'angaha aro songona sokangaha.

Songoni adita chel'engkuon ua achak mik-oako aro chakki teng'ako nikataha. Una agre-ba gilja ka'na konta dokakoba ua knaaha. Re'baroroe ua sepangahaoa pante me'trarangni jikjak jikjak dake, betbete aro git ring'e gilja nokchina mikkangangengako nikaha. Songo ga'dapsrangahaoa Kaljan on'tisa ja ja ji ji dakpilaha. Unon ua ja'su miksus jole re'na mangsonge chigaona re'angaha. Ua ramao me'tra bi'sa sakbriko watpakgrikaha. Me'chik bi'sarang mande mikkang gitalko nika niaha. Kaljanba uamangko ka'dingsike re'pakangaha. Uamangoni saksa mikterokrok dake namgipara Seringbal ong'achim. Indiba ua dal'ahani gimin Kaljan uko u'ijaha. Ua chigao au-mik-suesa nokchinade re'angaha.

Kaljan nokona sokon ma'gipa aiao in-mansopilaha maina ua uko sokbagen ine

maming chanchisoani dongjachim; Salgipino Kaljan songko wenaha aro songni manderang baksa namen golpo ka'aha. Salsao Kaljan at-tamchibara chibimachipak re'angaha; Chibi-mani an'chengko nikaton ua an'tangni chonmi-ting salrango maikai somoiko re'atahachim uko gisik ra'aha. Adita re'angkue ua rong'te dot-sani kosako asonge, chibimani jokangako ni jol jole pilak ong'anggin obostarangko chanchiate niaha. A'gilsak mai dakgipa biap ? Janggi tangani orto mai ? Mande ia a'gilsakona re'-bae mai namgniko man'a ? Mandeara chasongsaoni chasongsaona nambatrrobebeama ? Skangni chasongna bate da'oni chasong nambatbebeama ? Iarangko chanchie nion ua ma'-sisokna neng'aha aro maming aganchikoniona sokbana man'jaha. Unon ua sko rime, mikil samgnikon reprepe niwingwangaha, aro an'-tangni jeponiko cigarette pongsako bikote so'-bake chanchiangtaiaha.

Ia songni namroropajani a'sel mai ? Manderangan namjama; obostaranga champengeng-ama ? Songni mastera maiko dakenga ? Pamong procharokrang mai kamko ka'skaenga ? Rengsanpa maikai songko dilenga ? Sani dos ? Manderang ku'mong nangrimjade ong'ja, dilgipa

namode dal'a kamrangko chu'sokatna man'na-ba gnang. Uamangni bang'a sing'anirangko chanchiate niode uamango bang'en u ie ra'na skani gisikba donga. Indiba uamangni ja'man chakrikenganiko nike Kaljan uamangna ka'sachakaha. Indiba ua uamangna maikai dakchakgen ?

Beben, ia songna darangan simsakja ine Kaljan chanchiaha. Sorkari ia songko nirok sandiengama ? Uamangna maiba dakchakaniko on'paengama ? Puonani somoi ong'omangmangsan uamang dilgiparangko niksona man'paaia. Uamang aski do'me gita nabae songni manderangko tom'ate uamangni u'isokgi jarangko agane, tol'mikmike donangrongaia. Songni manderang jokona krakra dakode tol'akoba bebera'aia. Sason ka'giparangoni skango Pitor minggipa Boro Sahebni re'baana agre sawa ia songo nape niaha ? Beben, bilsigni ba bilsigittamprako tikka su'gipa ba skul nigipa sokbapaa; uana agre gipinrangde gri. Iarangko chanchie Kaljan gisiktango ka'onanga ong'katbaaha. Jaktangchi sason ka'aniara inbaken bon'aignokma ? Jatko chuatna am'giparang bao ? Nokma-Lasker dakgiparang maiko dakenga ? Ka'onange dongana agre Kaljan maiko

dakna man'pagenchim ? Sawa una chakpagen ?  
 Indake songona re'baoa an'tangkon dal'begipa  
 dilgipa gita nikpilaha. Indiba ua an'tangde  
 maikai songko namatna dakchakgen chanchiate  
 nion neng'niktaiachim. Kamko wate re'bae  
 songko dilnade ua neng'niktaiaha maina una  
 sawa dorinahako on'na man'genchim aro on'o-  
 ba badita on'genchim ?

Iarangko chanchimitingo ua janggilchipako  
 maiba gam'ako knae wipilaha aro bi sa saksako  
 nikaha. Bi'sa mamingkoba agangija jol jol  
 chittikosa cn'aha.

Kaljanba uko ra'chake sing'aha, "Sani ?"

Bi'sa inaha, "Abi, Seringbalni."

Kaljan gisiko to'tro ong'manoilaha aro  
 aganaha, "Ra, mittelane."

Bi'sade mamingkoba chanchigija jol jol re-  
 angpilana.

Kaljan niwingwange darangkoba nikjaon  
 chittiko oprake poraiaha aro Seringbal an'tang-  
 ko salakimdapchina mol'molakosa nikaha;  
 Unon uni ka'tong rongchu su'na a'bachengaba  
 aro uni gisik nangbee chanchienggiparang rang-  
 sanan uni gisikoni talangaha aro uni chanchiani

bilding bildang ong'a gita dakaha. Chanchi-sogijani somoio indakgipa chittiko man'soania uni gisikko namen su'pekaha. Uni gisikko damgni dake salaha.

Kaljan an'tangan mikchaade dongani gimin jechaknade sikjaengachim; indiba ua rang'san ku'chaknaba neng'nikengachim. Ua da'o mai dakgen u'ijaha. Jeba ong'bo, Kaljan chanchi-aha; anga rang'san bingbang dakna nangja. Ka'sine chanchichengesa jekoba dakgen maina jik kima, se donga kattade alamala ong'ja. Namosa nama; namjaode bilongen namja. Unon ua chittiko tem'e jepo chipe rong'toto asongaoni chakataha. Ua rong'te bi'sako kolame chibi-maona goataha aro gam bregija ku simikjol jole songchina mikkange re'baaha. Ramao wa'cheksiko kolame ua ramani samtangtangchi chaenggipa sambanggurirangko tong'tang tong-tang dake satbikbikjol jole re'angaha.

Kaljan songoni re'pilna salgittamsan bangki dongaiaba. Songtango dikdiksana dongaioba ua ukon ru'uta gita nikpilaha. Seringbalni chittiko man'e ua re'na ska pil'sa; dongkuna ska pil'sa dakaha. Uni gimin chanchigija dongnaba man'jaha. Indiba bon'chotao maiko dakgen

Kaljan an'tangni gisikko tik dakna man'jaengachim. Indiba ua ukon tikkit tikkit chanchie dongsiksakna a'bachengaha. Mongsongbate, uni gisiko minggni neng'nikanirang nabaaha. Mingsa, ua janggi tangna gita jaktango kamkon tik ong'e man'kujani gimin maikai janggi tangdilgen jajrengaha. Minggipinara, uni ma'apa da'o budepa buchuma ong'angroroengaha aro mikkangchi uamangni uni simsakani aro alduaniko nanggen. Indiba ua jikgipa kime katode uamangko uamangni nangbatgipa salrango dakchakna chol man'jawaha. Indake ma'a-pani kangal cholgri ong'e dongako nikna Kaljan an'tangan namnikjaengachim. Indide maiko dakgen ? Seringbalkon watsrang gnokma ? Uni ka'tongo Seringbalko watani gimin chanchion bate batesa una ka'saani nabarikrikaha. Indaken gisiko namnikbea ong'jaengoba Kaljan ka'tongchi draatako man'skaaha. Pilak kamon namararade ong'aija, namgijaba dongchapaia. Indiba namgnirang bang'batode ukon mande-rang nama ine chana. Sringbalko ka'ode an'tangni ma'a-pako dakchakna chol ong'jawaha. Indiba uamangkoba sawa dakchakgen ? Bilsibongamangni ja'manode uamangba an'tangni ma'a-pa gitan budepa buchuma ong'gnok. Je

ong'oba ma'a-pasa angko dal'ata. Da'o uamangko nangbata salosa maina wate katna nanggen ? Indakania namani aro nitoani ong'ja. Indiba maika'gen ? Dakbewalan indake ong'a; uko maikai dingtangatgen ? Kaljan da'o bewaltangko dosi man'na a'bachengaha. Indiba sawa ia dakbewalko bikotchengaha. Unon ua bikotchenggiparangko ka'onangna a'bachengaha. Manderanga iako namnikbebeen ja'rik-engama ? Ihing, anga bebera'ja. Indide sawasa iako draatenga ? Chrarangsa ong'enggen: Chrarangsa indakode bil man'bata aro uamangsa iano pangchakbata. In liba chrao mai bil gnang ? Uamang maiko dakpaani gimin angni kosako bil gnang ? Kaljan chanchitaitaioa tik ong'nikjaha aro indakgipa dakbewalo ke'a-tako man'ani gimin an'tangko ka'onangaha. Namgija bewalko gimaatna nanga ua chanchi-aha. Mande niamni nokkol ong'na nangja. Niam ba bewal mandenasa ong'a. Mandena namgniko ra'bajaode uko maina dingtangat-jawa ? Mande niamni nokgipa aro nokkol ong'osa nama. Iani gimin maikobade dakna nangchongmotgen. Indiba sawa a'bachenggen aro baoni a'bachenggen ? Kaljan an'tangba chanchion chanchisokjaha.

Kaljan an'tangni kam ka'chakram songjin-  
maona re'angpilahaon salsa neng'takani ja'mano  
kamtangko jako ra'epilaha. Ua kam ka'joljol  
an'tangni porikkana kena paksa ka'donga paksa  
dake nichaksoaha. Una agreba uni gisikko  
minggipin obosta golmal ka'aha. Uara Sering-  
balni gimin chanchianian ong'achim. Adita  
jarangna uamang chitti segriken ja'mano ua  
kamko matchotatsrangna mangsongaha. Indiba  
an'tangni porikkani biteko u'ichengna aro jak-  
tango baikam'gipa kamko man'aona sengchina  
ua seataha. Seringbal ukon namnikpae sengna  
namnikaha.

Sal ong'ahaoa uni porikkani bite nakataha  
aro Kaljan name chu'sokahanina kusi ong'be-  
aha. Uni krengbee jotton ka'ania magna ong'-  
jaha. Ua an'tangni ripengrangko rime uamang-  
na kusi ong'e cha alaha. Ua namgipa koborko  
an'tangni ma'a-pana aro Seringbalnaba u'iataha.  
Uamang aro songgimik Kaljanni chu'sokanina  
kusi ong'aha maina ua songoni skia man'gipa  
da'o saksa ong'kataha. B. A. matchotahaon  
Kaljan an'tangni ka'enggipa kamo dongkamgi-  
ja nambata kamna jotton ka'na mangsonge  
Sorkarini porikkako ra'skaaha. Ua ia porikka-  
oba seaniode chu'sokgipa ong'e agangrikna



okamatako man'aha. Indiba uni re'angnasiani salsagipaon Seringbalni pagipa sokbaaha. Ua pagipani saa bilongbeani gimin Kaljanna aganeaha. Kaljanna da'o namen engtogija obosta ong'aha. Ua agangrikao chu'sokgipa ong'paode nama kamko man'genchim. Indiba ua kamna mikpakma niari sinasienggipa pagipako simsakgija dakode ja'mano an'tangan chaktogija duk man'e chanchina nanggenchim. Kaljan maiko dakgen ? Da'on uni mikkangchini janggi tanganio dal'oro churorognina nambegipa chol o.g'achim. Indake changsa chol man'ako galatode uko man'taigenma ? Minggipinara, uko bi'saoni aldumittange dal'atgipa sinsienaga: Pagipa jedakeba uko an'tangni sinaskang nikannga sikgen. Indita ua an'tangni kamkosan dal'nikari pagipana simsakgija dake uni nangnikbatgipa salo mikkanz pa'ejaode uni pagipa baditana kingking ka'tong be'genchim uko Kaljan chanchiaha. Indake tosusae nichaani ja'mano Kaljan an'tangni pagipako ninan re'natik ka'aha. Isol angni ka'nilenggipa kamko donsoengode haida ua uko mikkangchiba man'kunaba donga ine ka'dimeana agre Kaljanna naming gipin chol dongjaha.

Songona sokon Kaljan jajrengbeesa ja'ku

de'aha: Songni ramako re'bamitingo uko ianpakode achakrangmangmangba sing'jachim. Kaljan jripjrip jajrenge chanchiroroe re'baaha. Ua pagipako niken bilongbee saahani gimin namen dingtangbeesa nikeaha. Uni pagipa ru'uta salrangna saahani gimin namen ram'beaha aro bilgri ong'aha. Uni mikango neng'beaniko nikaha. Uni mikkolrangan tu'pilaha aro perang napkotaha. Ja'a jakrangkoba neng'beesa il'engna man'achim. Kaljanni ma'gipa pagipani palang ketchio skopangchipak asonge gijip jiptimengachim.

Kaljan ka'a suang suang dake sambaona re'bae inaha, "Anga re'baha, baba. Anga sok-bajok."

Sabeenggipa pagipa uni ku'rangko knae mikjrao dake Kaljanko niaha aro aganna jotton ka'aha. Indiba uni ku'chil moako nikana agre uni ku'rangko knajachim. Kaljan gisik tango pagipana ka'dongani dongjaha. Indake ua adita chadenge niani ja'mano a'palchina ong'katang-aha.

Adita somoini ja'mano Kaljanko okamataha: Ua ka'a suang dakbate chaangaha; Ua napang-ahaon pagipa uko nitataha aro agantailaha aro

il'eng pil'eng dakaha. Uni giinin ma'gipa uko asongataha. Unon ua niwilwalaha. Uni ja'mano ua maikoba agantaiaha. Indiba sepango chadenggiparang mamingkoba name knana man'jaha. Uni ja'mano sagipa rang san bakgit'chakrangni nom'beenggipa be en gita ruekangaha. aro skoko choknokaha. Bakan uamang uko tuataha. Indiba uni jakmit'chiko rime niode cha'suako man'jaha. Ma'gipa tuenggipa bimangko gipake chrike grapaha. Kaljande uko uko daknaba changjaha. Ua sambao chadenge ia pilak ong'anirango mikrontangchin nikengachim. Uni ka'tongde tipsan tip rongchu su'engachim indiba uni mikronode mikchi rong-saba nakatbaan grichim. Brigimin me'aparangni ka'tong gita uni mikkang ka'beaniko mesok-gija rakkina man'aha. Indake Kaljan pagipako minit kolgrikimang nikenan man'paaha. Pagipako gopmanahaosa ua attamo chanchiroroe mikchi rue rue na'baskaaha.

---

## Noksan

A'chik a'songni badiaba biapo nokdang ge'sa gnangchim. Nokdang nama ong'paja; kangal kam ka'e, neng'skime janggi tangpaaigipasa. Nokba dal'a ong'paja; noktop bi'sa chonbe'esa rikaia. Ma'drang jela ong'paja; jiksesamangmang mikkutengteng sakgnisan; bilsi bria ong'kuja, bilsok jaksokmitingsa, uamang bilsig nimang do'si do'dokaoni salrangko re'atengachim.

Kangal cha'na ringna chu'onge man'paja da'nang; pring attamnan cha'atok ringatok dakai-gipasa. Kangal inming inming mandeskaba mande mingpaja gita uamangni nokchide re'jagaja. Biapna krakra nok a'se donga gita, songo meli-ga'kragija gita sing'e sandie nigipaba grichim. Indiba gamnasa kangala, tangkasa tekkia; nama gunde, ka'sagrikanide iamang sakgnion suakpilaiachim. On'titikon chu'ongnike, toai tojai song'e chane cha'e attam salniangachide uamang sakgnini a'palo a'songe agangrike mola on'grike ringakosa manderang nikat-

rongachim. Gisi-jegrika gri da'nang da'omang-mangde; sakgipinko ina-sola dongjamancha. Iani giminde mandeska uamangko mittelnan nangaigen.

Indaka obostao janggi tangmitingo badiaba salo sin'kari a bachengachibara jikgipa dikmeat-tam so'o demikkang nikaha. Iamang sakgnini janggi tanganiko mande gital sokbae da'o chu'sokataha. Pagipa degipani mik-kangko nike namen kusi ong'beaha; ka'-dongsoanirangba nakatbaaha. Indiba uni ka'-tongo jajrenganirangba gnangchim. Jeba ong-bo indaka somoiode gisiko kusi ong'anian bata aro indake pagipa gital bi'satangko mikkang nie dikdiksana suk ong'e dongengachim.

A'gilsako janggitanggiparang bang'bata salrangkon duk aro mikchirang baksa re'atranga Jakchomsamangsan kusi ong'e ia biapo dongna man'aia. Jeba ong'bo duk aro sukko rim'brine an'chingni janggi tangani salrangko su'uata.

Apsan obosta ia kusi ong'beenggipa pagipa gitalna nabaaha. Uni kusi ong'ani tong'kande ong'aiaha maina uni jikgipa unwalon an'tangni degipa ba'daldalko aro segipa saksakamkamkon wate ia a'gilsakoni ekangaha. Indake bilongbe-

gipa obosta, atchia aro sia, ia man leko dikdik-sani gisepon su'pekaha.

Indaka obostao mandea maiko dakna ama ? Ia chol jokgijagipa segipa saksan maiko dakpa-gnok ? Jikgipani siangana ka'beakon chakgen-ma, bakgitchak odekkon maikai alduna man'g nok chanchie jajrengama ? Saksanmangmang da' nang maiko dakpagen. Jara dake mikrono mikchi rue rue asongdate dongana agre una gipin chol dongjaha. Ia a'gilsako saksa sak-gipinni dukko chilchakna mande jik-se kima aro janggi tanga gimik dakchakgrikna ku'ra-chakgrika. Indiba maibakai uamangoni saksa dongchangjahaode saksan dongrikgipana baditan gimaani :

Wachini salna ka'dongara ka'donggramaia; mikkasim andalgrip dake teng'baenggipa salni ja'dilrangko dongpenganiara manderangni ka'tongko dikdiksa kusi ong'ataia aro ka'donggramataia. Ia mandenaba apsan jrimbegipa bal ongropdapaha. Ua da'o maiko dakgen? - Mai kai ua bi'satangko aldugen ? Maikai saksan salrangko re'atgnok ?

Ua bi'satang bakgitchakko ba'rachi rem-reme gipakari mikchirara jikgipani mikkangko

nitate ru'uten jara changa gita nie dongchaaha.  
 Degipa bakgitchak maiko u'ipaa da'nang ?  
 Bi'sajokona duk sukko u'ipajae uade okkriana  
 grapataha. Unosa ua bi'satangko gipakako  
 rang'san gisik ra'aha aro ka'siksike grapaha.  
 Indiba da'nang jikgipa sepango dongengoba  
 dakronga gita una ka'dimeani kattarangko  
 ianpako aganatjaha. Ua bi'saman'daldalgipa  
 an'tangni okoni ong'katdaldalgipanamangba ka'-  
 sagijagipa me'chik gita soktangko kanjaha.  
 Indake ia bi'sa ma'ani sokko changsamang-  
 mangba cha'manrikpaha. Changsamangba ua  
 ma'ani ka'bako rimao suk ong'aniko u'irikpana  
 man'jaha. Knatogipa ma'ani ku'rangko ua  
 pangnaba knapajawaha aro ma'ani mikkangko  
 nikpajawaha. Ma'a grisa uade janggi tangna  
 nangaignok. Pagipara simsakoba aro ka'saoba  
 ma'ko sokpagenma da'nang : Indiba ia paning-  
 sana donsogimin rasongko sawa dingtangatna  
 ama ?

Jikgipana kalimbeoba da'nang magnasa  
 ong'aijok. Sigipade siangjok; tangpiljawaha.  
 Janggi tange dongpaode depante Saksamang-  
 manggo jikgipani mikkangko nike kusi ong'pana  
 man'gen ine chanchie ua uko aldumittangna  
 holko sandiaha. Obostana krakra ua ma'gri

bi'sakoba Noksan mingaha. Pagipa bi'sako aldue tangatna cholrangko sandie bon'kamao ma'gri bi'sarangko alduram biapona rimange Noksanko donbaaha aro bilsigittamni ja'mano rimepilna tik ka'e re'baaha.

Gisik rongjrimoba, da'nang, pagipa detangko alduna, namao dal'atna gisikde dongpara aro indaka chanchiaon ua pangnana rakbate kam ka'e pelsa pelgni man'paako bil amadipet chimongaha. Chol man'on, gisepo, pagipa detangko nina re'angaha aro bi'satangni dal'baro-roako nike kusi ong'aming duk ong'aming dakaha. Bilsigittam badeangahaon pagipa Noksanko rimbae an'tang baksa donaha. Pagipaming dongmitingo Noksan a'ba gamachi re'rikpana nangachim. Indaken ua adita bilsirangko pagipa baksa a'bao salgimik gimik dongpae re'ataha.

Indiba pagipani gisik detangna chanchisoani dongjade ong'jachim. Uni gimin Noksanko ua skulo poraiatna salsao rimangaha. Bi'sade da'nang maiko agangen; ma'a pani gisikkon man'paaia. Ua katta manigipa aro nitogipa bi'sa ong'baaha. Lekka poranaba ua gisik nanggipa ong'achim. Pagipa una pilak nangarang-



ko amadipet dake on'na jotton ka'aha. Indake Noksan kusi ong'gipa aro chu'ongnikgipa bi'sa ong'e dal'baaha. Indiba indakgipa salrang bang'e baijaha maina Noksan cha'na ringna, ganna chinna chu'onge man'engoba maibaka'e dongsiksaka gita dakna a'bachengaha. Ua maikoba gisiko nangnikenga gita pangnan siksik saksak dake dongtogija ong'aiaha. Indiba ua mai manchako nangachim ukoba an'tangde name ma'sisrangna amjaengachim. Indakako nike pagipa jajrengna a'bachengaha. Indiba uaba an'tangni jajrengako bi'sani mikkangode mesokjaha. Pagipa bate bate bi'satangna an'tangni ka'saaniko pakdaproroaha, aro maikai uko kusi ong'ate rakkina man'gen indake pilak kam aro kattarangchi jotton ka'aha.

Salsao Noksan skuloni re'bapile, mikchi jingjeng jingjeng dake pagipao sing'aha, "Chingni skigipa iako nang'mana mesokbo ine ia lek-kao on'ata. Baba, anga iako sana on'gen? Ama bano?" Indinako knaarin pagipani ka'tong rongchu su'na a'bachengaha maina ua iani giminan chauchie jajrengsoengachim. Ua mamingkoba aganchakna man'jae Noksanko rang'san gipake, mikkang rim'roke, mikchi rue rue dake gipinchiko nie adita somoina dongaha. Ka'tong

chakna amkalahaosa pagipa bebekon aganna nanggen ine chanchie inaha, "Dede, nang'ma nang'ko man'ani walon an'chingko wata re'angjok. Ua maming saloba re'bapiljawaha. An'chingde sakgnitangtang janggi tangna nang-aignok."

Bi'sa ong'oba, da'nang, Noksan ma'gipani siako da'o ma'sijok aro ua ka'siksike grapaha. Pagiba uko ka'dimeatna jotton ka'e ku'rang rinokachi aganaha, "Dede, na'a duk ong'na nangja. Anga nang'na simsakenga. Nang'ma dongjahaoba anga dongkuenga. Anga nang'na ka'saenga. Na'a maiko nanga aganaibo; Changsao an'ching nang'mako grongpilgen. Uni gimin na'a jajrengna nangja; kusi ong'e dongai-bo; katta manibo aro name, gong'e poraibo, gipinrang gita denggu daknabe."

Indake degipani mikchiko u'site pagipa ka'saani kattangko agane uni dukrangko chel'atna jotton ka'aha. Pagipa detangni gisikko bingbangatna chanchie ka'dingani golpoko bang'e aganaha; Noksan ua golporangna gisik on'na a'bachengaha aro ja'mano ua ka'dingsrangaha. Indake ua bi'sa aditani ja'manon gisikni dukrang chel'angaha gita ong'pilaha. Indiba, da'nang, Noksan un' sal dipet skang gitade gisik

balsrange kusi ong'na man'jaha. Pilak uni kusi ong'anirango chu'soksrangna man'gija maioba kengbinge donrika gita dakaiaha. Jeba ong'bo, ua bi'sa ma'gipako gimaatahani gimin rasongtango ka'onangenggipa gita, maioba todongskana ine ku'chingenggipa mande gita poraianirango aro kamrango bimchipbate dakskaaha. Indaken adita bilsirangni ja'mano ua middle skulo poraia matchotsrangaha. Poraikuna skoba pagipani cholgriako nike aro uui bilgriroroangengako ma'sie'aro noktangni obostako chanchie poraina skako dontongdrana nangao ga'akha. Indake pante bilsokba bilsokbaahani gimin ua pagipana jakkaltobegipa ong'baskaaha. Ua pagipa baksa a'bao kam ka'pae pagipako dakchakaha. Noko song'a chanakoba dakbaronge da'o ua ma'nipal song'e chane on'skaaha. Pilak nokni kamrangko ua an'tangan dakaha. Indake Noksan pagipa baksa adita salrangko re'ataha.

Noksanni poraia matchotani ja'mano jagittammang badeangahaoa ua songo chongipa post office ge'sako kuliaha. Noksan ua kamna dor-kasto gale nipaaha. Beanbebe ua kamkoba man'aha. Noksan namen kusi ong'beaha maina ua pagipako dakchakna chol ong'batgnok ine chanchiaha. Ua kamtango simsake aro kusi

ong'e ka'e bilsisa jadokmangko re'ataha. Songni manderangba uni kakket dakako aro bimchipako nike uko namnikbeaha.

Ua somoion uamangni janggi tangani obostaba skangna bate nambataha. Da'o Noksan mamangnaba sinteani dongja gita ong'pilachim. Cha'ao ringao nambee cha'pana man'jaoba skangni obostako tosusaatode chu'onga gita ong'aha.

Salsao Noksan songni mel bongamang chel'gipa song damsaona kam nangani gimin rojola gita re'angaha. Ua songo uni mamatang saksadongachim. Ua me'chik bi'sa saksako ramadilo chi ko'e re'baengako grongaha. Noksan ia me'tra bi'sako namen u'iachim maina apsan songni primary skulo uamang adita bilsirang porairimachim. Indiba ia me'chik bi'sa an'tangni mamatangni demechik inede u'ijaengachim. Ua me'tra bi'saba Noksanko pagipani gritang nanga inede u'ia grichim.

Panteni gisikjokona me'tra mikterokrok namako nike ku'sik on'e nina sikjok. An'tangni rama nikgijako pa'sike Naksan ku'pretna chol ra'aha aro indaken uamang ja'mano agangrikbebeaha. Kam matchotahaon ua Salmeni noko

ropakbaaha. Uano agangrikesa ua an'tangko Salmeni pagipani grit'ang ine u'iaha. Indake ua rama re bapilmitingosa gisiktango mamatango ko galchipani gimin gisiko suk ong'gija chanchiroroe re'baaha.

Noksan kamtango gisik nange ka'angku-aha. Indiba uni gisiko suk ong'ja gita dake dorgkamaiaha. Ua an'tangni nikbagipa Salmeni mikkang bimangko, uni knatogipa kurangko maibakai gualna man'ja gita dakaiaha. Ua maini a'sel indake ong'enga chanchie nibe-aha. Mamatango an'tangko cholgri duk man'mitingo galchipani giminba chanchie ua duk man'roroan baksa ka'onangroroaha. Indake ua uni demechikkoba ka'onangchappagen ine chanchiachim. Indiba namedake chanchie pagipani kamna demechikko dosi on'pana chanchiao maming kakket ong'aniko nikjaha. Indaken ua mamatango ka'onangoba demechikkode ka'onangna man'jaha. Uamango gualskana jotton ka'on bate batesa uni gisiko Salme aro uni pagipa nabaroroaha. Adita jarangna kingking indaken ua gisiktango bilding bildang ong'aha. Uamangoni ekna chanchiara batesa sepangrorangaha. Gisiko skoba ka'tongoara ra'chakna amskagijani ong'engachim. Indake ong'on

mande namen man'dikani obostao ga'aka. An'tangan an'tangni gisepo meligijani ong'a. Indiba indakmiting somoio sawa sako matnangna ama ? Noksan badita iani gimin chanchia inditan uni gisik nom'roroangaha aro ka'sne ka'sne uni ka'tongo cha'u gita Salmena ka'saani gisik nakatbaaha. Giting bolni chagata gita ja'mano pilak uni chanchianirangko ka'saachin siatskaaha. Indaka obostao Noksan gisep gipuo mamatangni nokchi re'angaha. Ua mamatangko ka'onanganis gisikba dongjaha.

Salmeba, da'nang, gisikode chanchiade dongpaachim indiba ku'pretsrangna pa'jae ba kamchiba mesokna kratcha'e ripengska gita Noksan baksa uni re'baon ropaaha. Gisikode uaba tikkit tikkit dongtogija chanchipaengachim. Gisik gnanggipa me'chikjokona ua rang'san mamingkoba name u'ichenggijade gisiktangkon tik ka'na jajrengaha. Indiba Noksankoba maiko jegen: Rang gam dongpaja beben; indiba uni gisik aro cholonde nama aro uni kosako da'omangmangde maming mitaka aganako knakujachim: Iarangko chanchien Salme an'tangba gisiko chinaproroangaha.

Iarangko mamatang Salmepaba niari dongade ong'jaengachim. Uaba Salme aro Noksanni

gimin adita salrangna chanchiaha. **Mande** namako nike mamatang ja'mano Noksanko chawari sing'na gisiktango tik ka'srangaha. Indake salsao ua Salmeo Noksanni gimin sing'aha aro an'tangni dakna 'mangsongako agane on'aha. Pagipani mittelako knae da'o Salmeo maming jajrengani dongjaha. Ua kusi ong'e pagipani namnikako dakna ku'rachakaha.

Noksanba an'tangni miksongako pagipana agane on'aha. Pagipa uni kattako knaarin ka'tongo til'ik dakpilaha aro jajrengna a'bach-engaha. Salmeko jeja beben maina uni kam choloni gimin mamingkoba da'odipet knakuja; Indiba uni pagipani an'tangni duk aro cholkok-gijani somoio maming dakchakaniko on'jahani gimin chanchiate ua duk ong'aha. Minggipin, an'tango saksakamkam dongpaenggipa janggini bitchriko gimaatnasiengani gimin ua budepa bilgri ong'e saksan salrangko re'attaina nang-gnok ine chanchiaha. Uni depantetangni dakchakachi adita bilsirangna neng'take janggi tangpana ka'dongsoani da'o guuri gita jrong-angaha. Indiba Noksan pagipana mamingba jajrengjachina aro dakchakangkuna ku'rachake aro ka'dongbee aganahani gimin kattarangko bebera'na man'jaoba duk ong'a gnang degipani

skako dakna on'na nangao ga'akaha: Pilsa gita budepachi de-su'drangkoba nike siangpana skaha.

Antignimangni ja'mano Salmeni mahari Noksanpaona re'bae uni depanteko chawari sing'eaha. Indake uamangko nangrimatsrangna gita salko jako tik ka'e donangaha. Noksan aro Salmede mikchaatangko man'e kusi ong'beaha. Indiba, da'nang, Noksanpade gisiko jrima gnangsa janggi tangna a'bachengskaaha.

Donsogimin salna sengmitingo Noksan kamtangni gim'in simsakgija dakjachim. Ua batesa bimchipbate aro simsakbate aro kusi ong'bate kamrangko chu'sokataha. Ua pagipako kusi ong'atna man'adipet jotton ka'aha aro pagipako dakchakna man'engani gimin kusi ong'aha. Gisep gisep ua bia ka'ani ja'mano mai obostao ga'akgen aro uni pagipana mai ong'gen iarangni giminba chanchiaha. Iarangko chanchien ua sal somoi sepangbaon jajreng jajreng dakpilaha.

Mitam obostarang cha'ugipa gita mandeni niksogija aro chanchisogijan salo nabara: Indakgipa obosta Noksannaba re'baenga ine sawa u'ia ?



Bia ka'na tik ka'sogimin sal somoiko chane da'o antisa tik taksan dongaijok. Salmeni noko uamangko bia ka'atna ine sarao paja pinge aro gipin kamrangko ka'soe manderang salko nichaksoengjok. Indiba unwalon Noksan kam ka'gipa post officeoniko tangka gong ritchabongako cha'uaha. Noksan maming dos dongpajoba chanchichipao ga'akaha aro uko rim'aha. Noksan an'tango maming dosi dongja ine jechakbeaha. Indiba nama sakkiko man'jahani gimin uni kakket ong'ani magna ong'aiaha. Songni manderang uko an'tangni bia ka'aona korosna cha'uaha ine potch'ipaha. Jechakoba uni kattako sawa knachakpagen? Kangal, cholgri, bi'sa ma'griara sani ka'sachakako man'pagen? Indaken uko bon'kamao bichal ka'gipa jadokna pattoka donataha. Ua da'o manderangni mikkango cha'u ong'jok; dosi dongjaoba dosi ong'jok. Ja'man ja'wiloba manderang uni gimin aganritingkugen. Kangal cholgriara indaka somoio maio pangchakpana man'a. Nokmasa kakketnaba tol'anaba paisa pakna ama. Mamatangba da'o bachijok? Kangalde dukko chake dongpaana agre maming gipin chol dongja. Noksan an'tangni gimin, pagipani gimin aro Salmeni gimin chanchie uni duk aro kratcha'ani arikon u'ipiljaha.

Salme Noksanko indaka obostaoniko jokat-na pagipao mol'molbeaha. Pagipa indaken a'bachengaode Noksanna dakchakna chanchiaha. Indiba indakmitingchachao Salmena sriksrik mikchaenggipa pante saksa Noksanni kosako namgija kattarangko tol'dape on'aha. Kattarang ong'nasusu dake krabeani gimin Salmepa Noksano ka'dongani komiangaha aro an'tangko kratcha'atahani gimin gisiko ka'onanga ong'katbaaha. Uni gimin ua bonchotao mamingkoba dakgija jrip donaiaha.

Noksampa da'o changsa namgijagipa salrangko chagrongtaiaha. Indiba ianpako una dunagni dukni ong'aha maina uaba kratcha'na nangao ga'akpaaha. Detangko cha'u pote patto-ko donatani kamara uamangni nokdangni kosa-ko namjabegipa bimingko ra'baaha. Jeba ong'bo uade detangko cha'ugen ine maming saloba chanchinan man'jaha aro je gita pil'taitaie chanchioba bebera'nade man'jaha: Indiba uara an'tang saksanasan ong'aia aro detangna maming namgniko ba dakchakaniko nangmiting somoio ra'bana man'jaha.

Noksan pattoko jadokna dongna nangaha. Kusi ong'osa jadoka mamingan ong'ja. Duk

ong'gipnade jadokni salrang janggi tangakripna  
ong'aijok. Somoide mamingba ong'ja indiba  
namgija bimingsa mandekoa ong'siata. Iarang-  
ko chanchion Noksan ka'tong chakna ampil-  
gija mikchi jrajra dake dongaiaha. Ua Salmeni  
gimin chanchiataha, pagipako maikai mikkang  
pa'gen aro maikai an'tango ka'donganiko ua-  
mangni ka'tongona ra'bapilna man'gen chanchi-  
on maming cholkon nikjaha. Sani dosni a'sel  
ua indakgipa sastiko man'na nangaha Noksan  
chanchioba ma'sisokjaha. Iarangko chanchiro-  
roe duk man'e ua pattoko doagmitingo bilonge  
saaha aro jasamangni ja'manosa siaoni tangba-  
pila gita ong'aha. Ua an'tangnade maming  
jajrengani dongjachim maina siania una altu-  
batgipa manderangoni joke katani chol ong'a-  
chim. Indiba an'tangni budepagipa pagipako  
maikai uni ja'man janggi tangrikgen uko  
chanchiate unaba jajrengchakataha. Jeba ong'-  
bo saksakamkam a'gilsako un baksa dongpagipa  
pagipa aro saksakamkamna an'tangni ka'saani  
ka'tongko on'gipa me'chikoni ekatako man'e  
dongna nanganiara ua chaktogijani ong'achim.  
Minggipinara, pattokoni jokmanoba darangan  
uko cha'u ine gisikode chanchitokaignok ine  
Noksan u'iaha aro ia chanchianian uko mik-  
kangchi janggi tanganina neng'nikatbeaha. Una

agreba ua pagipani koborko mamingkoba kna-sojae unaba dongtojaha.

Noksanpa budepa bilgri ong'an baksana indakgipa jrimbegipa balko chilna nangao ga'-ake dukko chakna amjaha. Ua salang walang iarangni gimin chanchie duk aro kratcha'an baksa cha'a ringa dongjae Noksanko rim'angani ja'mano antignimang ong'on saa napaha. Uko nirok sandigipa darangba dongpajae uade saksansa Noksanna ma'ringe siangaha. Noksan indaka obostako knapana man'jachim. Indiba pagipa maikai duko ga'akenggen ukosa ua chanchiatna altuaen man'achim.

Salmeba duk ong'aming kratcha'aming be'-enah ram'sisie Simangpilaha. Uni bia ka'aniba da'o bon'chongsrangaha. Uni gisikode Noksan cha'uja ine kimkim bebera'ani dongengkuachim. Indiba uaba mamingkoba dakpana man'jae indin dongna nangao ga'akaha. Ua Noksanna ka'saa dongkuengachim. Indiba uni pagipasa Noksanko mitchiskaaha. Indaken ua songni pante saksako Salmena bia ka'drae on'aha. Salme maiko dakpakugen ? Apchangket obostao ga'akaha aro duk ong'beoba mikchi rue rue kamko chu'sokataha. Indiba kamsa chu'sokaia; ka'tongko sawa dingtangatna ama ? Chu'soke

ka'saani ka'tongko mamingchiba dingtangatna amja. Gisiko maming ka'saani dongjaoba song-sarni niam gita ua segipana dangdikede on'pa-aha.

Indake ong'ani jasamangni ja'manon Nok-sanni jadokna pattoko dongani somoiba matchot-jok. Indake ua pattokoni jokbaaha; Noksan pattoko dongmitingode jokningna sikbeachim. Da'o jokani somoi ong'chongmotahaoa an'tangni gimin chanchie pattokon dongkuna sikpilaha. Jeba ong'bo uko pattokoba rakkichajaha. Uni gimin ua ong'katbanan nangaiaha. Ong'katbasrangahaoa ua budepagipa pagipako nikenamen sikbeaha. Ua gisiko kratcha'a gnang ja'achi re'bae salgnimangni ja'manosa songona sokbaaha. Indiba songni manderangna kratcha'e ua walsimsim dakosa songona napaha. Unon ua noktangona sokningna sikbee darangchikoba niwilwalgija ramakosa nikomkomari ta'arakbee re'angaha. Indiba noktangko chel'ao niwatate nion maming teng'anikoba nikatjaha. Ua jajren-gaha. Indiba pagipa bachiba re'ange sokbapilku jaengakon ine chanchipil'aha. Uni gimin ka'donga gnang ua re'angaha. Sarao chadengdike ua pagipako okamaha indiba maming ku-chakaniba grichim. Ku'rangtangke knaani ja-

manode jrip mittip dakaiaha. Nokningchi napsrangna mangsonge Noksan do'gaona re'angaha. Do'gacholona sokosa ua nokking be'pruako nikaiaha aro rang'san kena napaha. Indiba pagipana mai obosta ong'aha ukode u'ina man'jaha. Adita chadengdike dongani ja'mano ua kratchaako minggija pagipani gimin sandina mangsonge re'angaha.

Noksan songsulni saraona sokangon deldik daktaiaha. Indiba ua an'tangko draate re'angaha. Noksanko niksoarin uni chanchisoa gitan namnikgijaniko mesoksobebeaha. Jeba ong'bo, ua uni pagipani siakode agane on'aha. Noksan uko knaarin bakan ong'katangaha. Da'nang, uni pagipana ka'donge re'bapaade magnasa ong'aajok. Uni duk man'a da'o chu'soksrang-jok. A'gilsako da'o una maia dongkua? Lak-nilak manderang bachitokjok? Uni mamatang bano? Uni madrang dongpajama? Sana agane ua an'tangni dukko parakpagnok?

Ua an'tangan badia ramako re'angenga uko mamingba chanchigija ja'kukosa de'angaiaha. Uni mikron samgnio mikchi jing'jeng jing'jeng daka gnang ua pagipani an'tangko chonmitingo ka'dimeatani kattarangko gisik ra'aha. Walni

andalan baksa una ka'tongni andalaba pakdap-  
aha. Ianiokma angni rasong ? Ua ramasam-  
ni rongtoto a'songari ka'siksike grapaha. Duk  
man'gipade, da'nang, dukrara; suk ong'gipasa  
sukko man'a ia a'gilsakode. Aditani ja'mano  
ua chakate ramajol jol andalmin'dik re'anga-  
taiaba.

---

## Dukni Krong

Jihova Sodom aro Gomorako nisinasion Lot aro uni nokni ma'drangko kate jokchina aganaha aro katangmitingo janggilchiko nipil-jachina raken beng'aha. Uamang songjinmani a'palona re'ongkatangmanahaon, beanbebe, sal-gioni wa'al aro gondok ga'akdape il'ilari kam-aha. Haida, Lotni jikgipa wa'al kamani gam-aniko knae an'tangni nok, jam, rang, gam aro an'tangni noksul, songsulni manderangko gisik ra'e ka'pakaha aro uamangni gimin chanchie nipilatmanaha. Da'nang, ua rang'san karini krong pil'aha.

1836 bilsini badiaba salo nok te'sao me'a bi'sa atchiaha. Rasonggri da'nang; ia bi'sa bakgitchak, jagni ba jagittamni ja'manon an-tangni ma'gipako gimaataha. Indaken sakgipin me'chikni sokko cha'esa ua janggi tangna ga-akaha. Ma'gipa dongjaming dongjaming ia ma-griko oksiko bibik nap'le kasi cha achim. Gipin-rangde da'nang; indake pari dakani giminan ia bi'sako rim'dik dangdikaba dongjachim. Uko aldumittangenggipa ma'detangmangmang una



ka'sae simsakjaode ia bi'sani a'gilsako tang-aniko bakkandikatgenchim. Indiba ma'detang da'nang; an'chitang chane ka'nilstape uko sanaha. Indiba una duk chu'ongkuja ingipa gita nokoni gipinrang siangskaaha. Uko aldu-mittangenggipa ma'detangmangmang maibakai rengrochengro bingbangrikpaaha. Indake ia bi'sa chonbemitonin dukchi chiripako man'aha.

Uni ma'detang saksamangmansan da'o unbaksa ia a'gilsako balrangko chilrimna kang-kare kae janggi tangrimna miksongaha. Indiba da'nang; me'chik bilgri, sea cholgri, kanamjabegipa a'gilsako neng'beesa tangdilnan man-paaiachim. Kangal cholgri gana-china gri okimu chakjoljolesa ia bi'sa dal'baaha. Adita dal'baahaon uko songni skulona watataha. Ua ba'ra suriko lengti bike, ki'sang pettarongrong nakate, skoo kni gaksi gakjak baksa kakalsisi dake aro sin'kariode wa'al chakani be'en bigil kaltappruesa skulchi re'paaiachim; Indiomangba ua porainade gisiko nangbeachim. Indake una ka'sachake, uko nirok-sandigipa mande dongpagenchimode haida ua leka-pora man'gipa ong'genchim.

In'diba danang ma'detangara, gisik dongpaoba, cholgri ong'e uko poraiatangkuna skulona watatchana man'jaha. Ua Class I-on poraie skulchi re'angnakuna skoba chol man'jaha. Ua ma'detang baksa a'bachu re'pae a'bao kam ka'ao dakchakpana nangaha. Indimangba iamangko a'baoba tom'tom watgipa dongjachim. Mi, misi, ta'bolchu, ta'marang namkariode buringni matburingrang walo a'bao nape cha'e bon'atrangachim. Indaken uamangde a'gitchaakosa oktango gapatna chol ong'paaia chim. Uni gimin uamang su'nap song'napjoljolesa bilsini salrangko re'atna nangaiaachim.

Bilsi gimikon iamangni janggi tanganide duknirara aro so'so jengjeng ong'anirarasa; wachio nokking dongjae mikka bitchi chisol-dapako chakna gita biapan dongpiljachim aro sin'kariaara ba'ra kancha dongpajae wa'alo be'entangko angjoljolesa walkon re'ataiaachim. Indaken ua walsao an'tangni ba'ra suuri kingsa, gipeng mikgni aro gro mikbri ong'gipako tong'sa ane tong'sa pine kom'tote tusibeengachim. Ua mikil sikangahaoa jumang nikaha. Jumangchide ia bi'sa an'tangni ja'a neng'beengako nike uko namatna krengbeengachim. Indakmitingon uni ja'a samgniba uni pine tuenggipa

ba'rako ga'tranga gita dakaha. Ba'ra gitchamsa ong'ani gimin ja'samgniko srongatmitingon salkringa gita dake grinaha aro tong'gni dake chottomsrangaha.

He, da'ode; maiko dakkugen ! Ua ukon tong'sa ane tong'sa pine tuna nangaha ! Indake dakon skoebipak gipe pinatode ba'rara kang-kareona sokaiaha aro ja'chekechina soke pinat-skaode je gita kom'tote chakoba pakkreona sokskaaiachim. Indiomangba da'nang, salgimiko neng'bee kam ka'pana nangani gimin wa'al ding'kuengode ua bakan mikil sikangaiaha. Indiba wa'al siangahaode sin'ani gimin mik-rakbapilaiachim. Indake wa'al sikjoljole tusipaachi walgimikon simaksamangsan tusina man'paaiachim. Indakgipa obostaosa ia bi'sa janggi tangbaaha.

Bilsignimangni ja'mano uni ma'detang segipa kimtaiaha. Indake ong'ahaon ia bi'sana pagipa gita simsakpagen ine ka'dongsoani dongachim. Uamangni namgijagipa obostarango olgrokatkalgen ine songni manderangba chanchiachim. Indiba wanggipa gitalara indakeba indakeba ong'gija; batesa ia bi'sanade skangona bateba namjabata obostakosa ra'baaha.

Ua mande ia bi'sana ka'sasrangjachim aro uko mikronan nina sikjachim. Uni gimin ia bi'sa basak basakoba mi cha'nan man'pajachim. Basakobara nokoba dongna man'jae buringosa salgni salgittam dongaiachim. Wachini salrangode mikka bitchi baksasa uni mikrononi mikchirang brine jokangpilachim. Ru'at ganggu chikanade ua maming chanchian dongpiljachim.

Dukrang jeba ong china ua ganding chindingna gisik on'bataha. Ua cholko sandie, am'bol pale, tangka kapgni annachet man'paachi an'tangna gamcha patsako aro genji kingsako breahaon kusi ong'beaha. Indiba ua una agrede mamingkoba dakdapnaba man'jaha. Dukrangehi chiripako man'e ia bi'sao mikchaa, namnika ingipani gimin maming chanchiani gisik nabaa grichim. Jeba ong'bo, dukrang mandeni bilsirangko champengnade man'jaha aro ua bi'sa dal'roroe bulsi cat bongani pante ong e ja'del bolchabaaha;

Ua apan bilsion ua ka'sapagipa ma'detang saksakamkamba saa bilongaha aro an'tangko sigen ine ma'sie jonggipako songgipinoniko okamataha. Uni jonggipa sokbae uni palang sepango asonggrikmitingon ma'detang ia pante

bi'sani cholgrianiko janape uni dukko chel'-chakchina bi'aha. Uni ja'mano mamatangnan nokkromna ku'pake donange an'tangde siangaha. Bi'sa an'tangna saksakamkam ka'sagipa sie katangahani gimin namen duk man'aha aro pangnana bate cholgri ong'e nikbataha. Ua somoijolon mamatangba an'tangni saksamang-mang dongpagipa gritangko chawari sike nio man'jae duk ong'engachim. Ia ua sianggipa abitangni kattako ra'e ia bi'sako an'tangni demechikna chawari ra'na namnikaha.

Mamatang bi'sako noktangona rimangaha aro an'tangni chanchiako demechikna parakaha. Demechik ia pantena mikchajaoba pagipani kattako pe'na sikjae ukon kimna ku'rachakaha. Indaken uamangko antigittammangni ja'mani bia ka'e on'aha. Jik kimanoba ia pante dambe gisik sokpakujani gimin aro kamrangoba gital ong'e name changkujani gimin uko nio-cheksirang mitake aro saie rorongachim. Indiba uni jikgipa namgipa aro gisik gnanggipa ong'ani gimin una ka'sae dakaha aro nokni kamrangni gimin skie-agane on'aha. Indaken ua ka'sne ka'sne kamo changgipa; chanchiao rongjrimgipa ong'baaha.

Manderang, beben, ia mandeko chonikachim. Indiba Isol uko name niaha aro uko an'tangni kamko ka'na tariaha. Adita bilsirangni ja'mano songni manderang uko toromo gisik nangako nike mondolini secretary dake seokaha. Una agreba ua 'songni Sunday skulo gisiko nange bi'sarangna skiachim. Uni kakket dakaniko nike uko ja'mano mondolini treasurer-naba siksarangaha. Indakgipa obostao ua songni mongsonggipa mande ong'baaigija indiba songonoko mande ra'ako man'gipaba ong'baaha. Songo manianirang dongode uarangkoba ua dakdilaha. Indaka kamrangni gimin gimikan uko namnika aro uni kattarangko maniachim. Bi'sarangba uni ripeng ong'achim maina ua Sunday Skulo skianirango uamangna Jisuni golporangko agane on'rongachim. Songko aro bi'sarangko nama janggi tanganio re'dilanina, pante-me'trarangko nama bewalo uamangni B. Y. F.-ko dilanina aro mondoliko katchae rikdilanina uko songosan ong'aigija indiba songni sepango wilwile donggipa gittimrangoba namnikachim.

Ua manderangna dakmikgipa ong'gija; noktango janggi tanganioba toromko jaktuat-jachim; Uni jako Rongtalgipa Sastro aroba

toromni gimin segimin gipin gipin ki'taprangba bang'en gnangchim. Niam Gitalko ua changgittam bon'e poraiaha aro Niam Gitchamkoba changsamangde bon'aha gita ong'achim; aroba ua Sastroni kattarangko chanchibewalrongachim. Mi cha'nasion ua nokgimikko Isolo bi'dile cha'achim aro tusina skangba gilja ka'chengrongachim. Uni ja'manosa tusina sikhgiparang aro rokuna sikhgiparangba rona man'achim. An'tangni mondolinaba ua bilsio man'aoniko bakchikkingni baksako choichanggijan on'achim. Una agreba chu ingipa uni ku'sik ning'achi bilsichikkingmangna napanga grichim. Nokoba indakani gimin uni bi'sarang aro gipinrang una ka'saachim aro uko mande ra'e katta maniachim. Mamatangara skangoni adita obosta namao janggi tangbaengani gimin una jrimgipa bal dongjachim. Ua jedakeba kok sotchetmangde mi man'achim aro gipin cholrangko bikote nok, jam, matchu, matterangkoba chimongaha. Indakao donge ua da'ode cha'na ringna, ganna chinna maming sinteani grichim. Uni bi'samitingo chagronggipa pilak dukranga da'ode jumang gitasa ong'aiaha.

Uni kusi ong'bee janggi tangengako Saitan

nikaha aro gisik nangen nie dongaha aro chanchiaha. "Nang'ko dakmajoani mai chol?" Saitan, uni chanchisojamingo niksokgijagipa janggil gita uko rim'na jom'baaha. Uan uni sadutang ong'achim; jean namgijagipa aro darangkoba mande minggagijipa! Ua Isolnaba kengijagipa ong'achim. Kangalni kattako knaode ba saoba kangal bi'amna re'baode ua nachiltangko rim'tipgipa aro jaktangko tom'e katgipa mandechim. Ua an'tangkon raja gita aro an'tangna darangba batgipa aro sengbatgipa dongja ine chanchiachim. Ia mandeni gimin aganode bang'bee aganna man'genchim. Indiba uko kan'dike aganode, ua mandeo salsamangba namanian grisrangchim. Songni manderangoni uko da'onaba agankolame siangengkua; Ia, indakgipa mande, sadutang chongipani kusi ong'bee, nokma chae, janggitangenganiko nikoa mikbuna a'bachengaha aro uko duko galonna cholrangko sandiaha. Unon ua sadutangchi re'ange nama nama kattarangko agane tol'mikeaha. Sadutang chongipa uni mittelmikaniko ma'sisokjae uni kattarangko knachakaha. Indaken ua chubatsranggipa a'gilsakni mandeni kusi ong'ani gadangona sokna gisiktango chanchiani nakataha. Indakmiting somoio uni sadutang, Saitanba, salsal



re'ange uko ropaha. Uni ku'pattianiko ra'-chake sadutang chongipa uni sorokni mohorini kamko ka'na jako ra'aha aro ritcha-hajal tangkarangko man'dapna a'bachengaha. Indake jako tangka-paisa kal'e rona man'ahaon ua a'gilsakni ramako re'na aro be'entangni sikako maming sason ka'a aro champenganigri an'tangko jakgitel wataha. Uni dingtangenganiko nikon songni manderang aro uni jikgipa uko mikrakataha. Gisiko toromna chanchiani uni ka'tongo dongkuengoba ua a'gilsakni kusi aro pilak an'senganirangna mikboke uarangko nipilataha. Indaka obostao ga'ake uni kamo maming toromi ong'ani gun dongjaha. Namgijagipa sadutang baksasa ua salsal roaiaha aro uni kattarangkosa ua gamchatnikbataiaha. Indaken ua man'atangko koros ka'wakwakna a'bachengaha. Ua noko aro antirango cha'aringan chotchangjaha. Gipin namgijagipa manderang uko ripeng dakbroke uni tangkarangko rope rope ra'e katangaha. Uni indakpile namgija kamona an'pilanganina songni namgipa manderangde unbaksa rorimnan kratcha'pilachim. Ua tas kal'e, chu ringe, joa kal'e, serejing ring'e roan chotchangjachim. Uni kusi ong'aniko bariatna gita sadutang una gramophone ge'sako breaha aro uko salsal jagit-

tammangna gam'ate nosto ong'ahaoa harmoni-amko breskaha. Uko saleba uamangni katcha-ani tang'doaha. Salsao ua mande sak sotbon-gako rime, merong gilna nomil sakchi'gniko tariate, uamangni mikkangko 666-ko kalichi see, dukni siani salni gitko tarie chrokdilaha. Indakgipa kamko kranikjae uni gipin sadutang uko manengaha. Indiba nama kattako knachakani pal ua ka'onange batesa uni kosako mokordoma dakaha. Da'nang; uni sadutang ka'sariri grapani ku'rangchi aganchakaha. "Aiao, sadu; angade nang'nan ka'dongbeachim. Darang mande ra'jaoba, nang'ni dukni salo, angni grian salo dakchakgriknakgipa ine ka'dongpaachim. Indiba na'a da'alo angko ekgale galenga." Unon ia namgijagipa mandeni ka'tongo uni sadutangni ka'a be'ani kattarang nangeaha. Ua ka'sine chanchipile; kattarangko sandiroroe, an'tangni ong'gija dakanirangko nikbana a'bachengaha. Ua gisiktango inaha, anga da'ontaltal indakgipa kamrangko dakjawaha aro angni kosako je kattako aganoba anga chakchike dongaignok.

Pangnan namgijagipa mandeko ka'sine aganchakode uni ka'tongko doktikna chol ong'a. Ua mande kratcha'pila aro gisik pil'a. Uni

gimin saoba nang'ni kosako kragija, bobil dake, rake nang'ko aganba'engode na'a una ka'sine aganchaksona gualnabe. Unon ua an'tangni kamko gisik ra'e kratcha'pilgen aro mikkangchi daktaijawa. Ro'ongska ro'ong nangtingosa wa'al chaa.

Namgijagipa uni sadutangde da'ode nosarikon seke kimsrangaha. Ua skatang janggi tangkuaha aro songni-nokni manderang baksa meli-ga'kragija donganguaha.

Sadutang chongipa, changsao nambegipa mande, indake namgijagipa kamko Isolni mikkango ka'aha. Ua a'gilsakni an'saoanirangna ka'pake nipiloa papni wario gipuaaha. Indake da'ode uni kusiara duk aro ka'dinganiara grapani ong'baskaaha. Ua a'ba jamang saksan dintang biapo o'e nokma sakbrini a'kingko agal kamataha. Indake uni kosako dabiani aro gro rikanirang nabaaha. Uni gro bang'dugaahani gimin ua chotna amjaha. Ua jrimbegipa balko chile, namgijagipa obostao ga'ake dukko man'na a'bachengtaiaha. Ua gisik jrimaha ara ka'tongtango duk man'e bilonge saaha aro changgittamna kingking sibokaha. Ua changsao sibokmitingo nikaha, saksu ba'ra bokako chingipa bangbango chadenge

uko okamaha. Unon ua ku'chakaha. Bangbango chadenggipa inaha, 'Nang'ni pap namen bang'aha. Nang'ni papnikri da'o nang na sastiko ra'baenga. Donsogimin chu'sokkujana kingking nang'ni janggiko jaksiku'teo donaigen. Niba ! Ia nang'ni pap ! Da'o nang'ko ia nang'ni pap baksa so'gen; na'a tangkuode jokgen, siode gimagen." Uni papko mesokon uni bojako mai baksa tosusagen ? Agannan changpiljachim ! Unon ia mande a'ao ga'akaha indiba bangbango chadenggipa mande uni knio rim'e uko bangbangona saldo'ha. Unon ua aganaha, "Ia nang' pap baksa nang'ko so'gen." Uni ja'mano ua uko paptangni boja baksa kachape soaha. Indake so'on pat busruko jekai kerosin rudape so'ode kamachim ua mandeko nikpilgija wa'al kamaha aro ja'mano jentensa manggilong gakarong tangrikaha. Indake ong'on ua ba'ra bokako chingipa aganaha, "Re'angbo, da'o nang'ni paprangko so'aha; na'a tanggen. Indiba nang'ni duk matchotkuja."

Ia ua sagipa mande sikkbakaoni tangchabapilaha. Ua wal sal tuaonin jentensa chakatna man'aiaha. Adita salrangni ja'mano uni be'en bigilo maiba biati narippuaha. Ua biati uko saknaataha. Ua mesakako aro sa'dikako chakna

amjae grappilaha. Songsulrang re'bae, una ka'sachake, samrangko tarie ra'bae on'oba uni saknaanirang, uni be'eno maming chaktoani grichim. Indaken ua wal sal tusina man'gija adita salrangna asongdate be'entangko rim'roke ba siksike grape chakna nangao ga'akaha.

Adita jarangni ja'mano una duk chu-ongkuja ingipa gita uni dedrangni mikkang nike katchapaanikoba una champengsrangaha. Uni dal'gimin, pante sokgimin, depante sakgni aro chonbatgipa demechik, jekon ua ka'sabatachim, uamang saksani ja'mano saksa sagitike siangaha. Indakgipa obostako nike songni manderangni gisik jajrengani ong'katpilaha. Bi'sarangni siani ja'mano ia mandeni obosta namjabatroroaha. Ua an'tangna duk on'ako chakchikna amjae toromgri janggi tangsrangna chanchipilaha. Ua be'en bilakpilahaon songoni re'ongkatangsrangaha aro a'bimandu buring jangchio saksan matburingrang baksa janggi tanga gita jagittammangna agor kiroke am'roroaha. Ia salrango ua baksakoba okimu chake buringon sina dakpilaha aro baksakoba mikka wachi chake grape dongpilaha. Walsao ua tu'begipa aro dal'begipa chibimani rikamo tuengachim. Unon chini maiba jontu uko

kalakna dake chiko ditdoataha. Unon ua jenten chakate katna man'e, buringchina chel-kale katange gam'bee grapaha. Indiba uni duk ong'e grapaniko darangba knana man'jachim. Haida, Isolba knachakjahakon.

Ong'bagimin dukna bate da'o una dal-batsranggipa duk sokbaaha maina uni ka'sagipa jikgipa uko wate a'sakoni re'angaha. Isol ua me'chikko, uni segipani a'sel duk chakatpana nangnikjaha. Da'osa ua an'tangni jikgipako duk on'anirangko gimikkon ka'sine ka'sine gisik ra'batokaha aro ka'a chakna amjaha, Uni jikgipa pilak an'tangna namgija dakanirangko chakchike, maming a'jak sokpilgija da'o sian-gahaoa, una batesa jrimbatgipa dukko on'aha; maina ua pilak an'tangni daka kamrangna kemako bi'rikna cholko man'jaha. Uni ka'tongo da'o dosi dakgiparangni dongtogija ong'a gita ong'aha. Una agreba una mi cha'na man'-kugijagipa bakgitchakkoba jikgipa gale donangaha. Ia bi'sa sok cha'na man'jae graprangachim; Pagipa an'tangni dukrang baksa maming chol ong'jae ia bi'sako alduna amjaengachim; Indiba Isolni nikanio ia bi'sana ka'sachakani napaha; maina pagipasa pap ka'aha, bi'sade maming dosi grichim. Uni gimin Isol ia bi'sana tangna cholko pattiaha.

Salsao ua songni adita chel'ao batan rakkigipa Nepal saksa ia nokni sepangkon re'pakangengachim. Unon ia bi'sani sikdek-dekpile grapaniko knaaha aro uko nikjaoba ku'rangnan ka'sachakani uni ka'tongo nakat-baaha. Ua chadenge adita knatime dongahaoba noko darangni ku'rangkoba knajaha. Uni gimin ua gisiko dongtojae nokningchi napangs-rangaha. Unon ua bi'sani ba'ra suuri gin'-chotchiao tue grapengako nikeaha. Ua re-angpile an'tangni baltino on'tisa gitchaa donggipa dudko ra'bae bi'sana kanaha. Unon bi'sa namen ringaha aro jripjrip dongaha. Nepal budepa nokdringko niwilwale nie ia cholgribegipa nokdangni bi'sa ine ma'sina a'bachengaha. Unsal intal ua an'tangni batanoniko dudko ra'bae bi'satang gita una ka'sa-simsake alduaha.

Jikni mahari una jik on'taia gimin chanchion katta minnan man'jaha maina ua namgijagipa aro denggugipa ong'a ine nikmanaha. Uni gimin darangan una chanchina gisik nangjaha. Batesa uamang uko a'rike galna chanchianiona sokangpilaha. Uamang uni kosako kal'ake roaha aro ma'manti katarangko aganaha. Indiba ia mande dukchi

chiripako man'gimin ong'e mamingba aganchakg'ja jrip jrip jara goka mande gita chake dongaiaha. Uni gimin uni jikni manderangba ka'onanganipal ka'sachakani gisik ong'katpila gita dakaha.

Ua mande changsao grape indake chanchiaha. "Ia dukranga maini a'sel ? Angni papni a'selma ? Angni papni a'sel ong'ode angna bate pap dakgiparang dongachim. Uamangde maina dukko man'jaenga ? Angko nina dakengasama ? Indake ong'oba angara toromi ong skaja. Indide mai ? Haida, anga mandeni aro Isolni nikao mande ong'nan krajakon. Pil'e ua chanchitaiaha, aro Sastroni kattarangko gisik ra'ate nikaha. Ong'ja Isol agana, jena anga ka sara uko anga doke skia. "Angde na'a angni doke skiako man'on nom'angnabe, chakattaibo." Daudni gitrangoni kattarangkoba ua gisik ra'ataha. Iarangko gisik ra'aton ua an'tangko Isol doke skiengasa ine bebera'na a'bachengaha. Indake chanohi-rikkote chanchiroroe ua bate bate an'tangni dakgimin kamrangna duk man'roroaha aro indakgipa namgijagipa janggi tangaoni an'pilna nangnikaha. Ia chanchianirangan uko draataha aro ua salsao re'ange an'tangni pilak paprangko



ku'rachake mondolio kemako bi'aha. Uni  
gisik pil'anina mondolini manderang katchabee  
Isolo bi'e kema bi'grike wataha. Ua namgipa  
gisikko man'pilaha aro pilak an'tangni kam-  
rangna kema ka'ako man'na salo changgittam  
dake Isolo bi'rongaha. Indakgipa obostao ua  
pilak an'tangni dukrangko chakna altubate  
man'aha. Uni obostaba skangna bate on'tisade  
tang doaha. Jeba ong'bo uni mikkingo dukni  
chinde maming dakeba gimajana.

Uan dukni krong gita gipinrangna mesokna  
aro mikrakatna janggi tange siangaha.

—Resh.

*Krong pante Am'beng*





**WILLIAM NAGAR**

**This book must be returned within 15 days  
from the date of issue.**

[illegible]